

Nehemáya

Nehemáya ekfu anụ Nchileke

¹ Ọwaa bụ akọ ẹhu Nehemáya Hakalaya.

L'ọnwá Kisilevu* l'afa k'ụkporo; ọ mu nọ ọ ọ Súsá, bụ ishi obodo; ² bẹ Hanani, bụ onye ufu ayi; yeru unwoke ọdo; tukuró shi Júda bya. Mu abya ajiá ẹphe aji ndu Ju ono, wafuru nụ ono; mbụ ndu ono, shi l'alí ono, a kpuru ẹphe ọ ndzụ; laphuta azụ ono. Mu jikwaruphu ẹphe aji Jerúsalemu. ³ Ẹphe asụ mu: “Ọ ndu ono, e shi kpua ọ ndzụ; ẹphe emetsua laphuta azụ l'alí Júda ono; bẹ ọnodu ẹphe dukwa ẹji nshinu; mbụ l'ọnodu ẹphe; bẹ iphere iya dukwa. Uphomkpuma Jerúsalemu l'ọ ha; zekwa l'alí. Ọku etsukotawa ẹke, eeshije abata iya.” ⁴ Ọ mu nutsuaru iphe ono; bẹ mu dugaru adugaru; raa ẹkwa.

Mu nọru abalí olemole; gụá aphụ; swiá aswisi l'ekfu anụ Nchileke k'imigwe. ⁵ Iphe, mu kfulu bụ: “Nggube Ojejeje, bụ Nchileke k'imigwe; mbụ Nchileke ono, paru ẹka; bya adu egvu ono; onye edobeje ọgba-ndzụ iya l'ẹhu ndu yeru iya obu; l'emeje iphe, o kfulu; l'ekoshije ẹphe ọ ya yeru ẹphe obu. ⁶ Ngabenu nchi; nggu efube ifu l'ekfukfu, mube nwozi ngu ekfu anụ ngu; mbụ ekfukfu, mu anọduje l'ifu ngu

* **1:1** 1:1 Ọnwá Kisilevu, bụ ọnwá tete l'oge ndu Híburu, nọ ọ nkere-ẹbo ọnwá iri ọ nanụ; mẹ l'ọnwá ekereshimeshi.

ekfu: eswe l'enyashi; l'ishi ndu ozi ngu, bu ndu Ízurelu. Nta-a; be mu ekfufuta ejo iphe, ayibe ndu Ízurelu mekotaru ngu; mbu ejo iphe, mbedua; me ndu ufu nna mu phe; meru ngu. ⁷ Ayi mewaru ngu ejo iphe, ha nshinu; haa ekemu ono, i turu ono; haa otso okpa, i toru; haa ome-l'ali, i doberu, bu iya bu iphe, i turu nu nwozi ngu, bu Mosisu t'e meje. ⁸ Nyatakwa okfu, i kfuru nwozi ngu, bu Mosisu; su iya: 'L'o -buru l'e t'e egudedu ire ephe eka; be ii-tukwa ephe nanu nanu l'iphe bu mbakeshi. ⁹ O le o -buru l'ephe ghakoberu lakfuta ngu; dobe ekemu ngu; l'eme iya ememe; m'o -ruhuru; eke a chiru ephe laa buru l'oha eke, igwe jeberu; be ii-shi l'eke obu rukobe ephe; duphuta ephe azu l'eke ono, i fotaru t'o buru eke aa-noduje akpo-ku epha ngu ono.'

¹⁰ "O kwa ndu ozi ngu; be ephe bu; buru ndibe ngu; mbu ndu i gude eze ike ngu; me okpehu ngu gbafuta. ¹¹ Nggube Nnajiufu; ngabenu nchi l'ekfukfu, nwozi ngu ekfu anu ngu; me l'ekfukfu, ndu ozi ngu ekfukwaphu anu ngu; mbu ndu ono, oduje mma t'ephe l'atsu ngu egvu ono. Byiko; menua t'iphe jeeru mube nwozi ngu ohuma ntanu-a; mbu t'i mee; te imiko mu du nwoke-a, bu eze-wa."

Teke ono; be bu mu shi buru onye agbajeru eze mee.

2

Aaha Nehemáya t'o jee Jerúsalemu

¹ Yo be l'õnwa Nisanu l'afa, kwe Atakusakusesu ùkporo afa; k'õphu ọ dũberu buru eze; a pata męe bya edoberu iya. Mu apata męe ono gbalahaaru iya. Ọphu eze 'aphũbukwanua mu l'ęke mu tanwũberu ifu. ² Ya ndono; eze aji mu iphe, meru iphe mu doberu ifu ęge ono; l'ębe abũ l'iphe eme mu? Sũ l'ę to nwedu iphe ọdo; gbahaa l'obu ta atsođu mu ęna.

Egvu erua mu l'ęhu teke ono. ³ Mu abya asũ eze: “Ndzũ eze; ndzũ ogologo gbururu jeyewaru. ?Bũ ngũnu kparu iphe ifu ta adũdu mu dzũdzũdu; lę mũbe onye mkpũkpũ mu dakpõshihuru adakpõshihu; ọku etsukotawa edukfu ayi; mbũ ęke ono, e liru nna mu oche phę ono?” ⁴ Tọ dũ iya bũ; eze aji mu: “?Bũ ngũnu b'ọ dũ mu tę ya meeru mu?”

Mu abya ekfuru nũ Nchileke k'imigwe. Mu emetsua nũ Nchileke; ⁵ bya asũ eze: “Ọ -buru l'ọ dũ nggũbe eze mma; mbũ; ọ -buru lę mũbe nwozi ngu nõ ngu l'obu; hanũa mu tę mu je alĩ Júda; lę mkpũkpũ ono, e liru nna mu oche phę ono; je akpũkwaa ya.”

⁶ L'eze-nwanyi nõnyabe eze; bę eze jiru mu; sũ: “?Nanu ęge mu a-nõ-bebe l'ije mu ọbu? ?Bũ teke ole bę mu a-lata?” Mu abya atũaru eze ọnu teke mu a-alata; yọ sũ mu tę mu je.

⁷ Mu asũkwa iya phũ: “Ọ -buru l'ọ dũ nggũbe eze mma; denuru ękwo nũ mu tę mu je anũ ndu gõvano azũ Ęnyimu Yufurétusu; k'õphu ęphe a-ha mu tę mu sweta jeshia Júda. ⁸ Nngu edekwaaphu ękwo ọphu mu a-nũ Ásafu, bũ onye

eleta oswa eze ɛnya; t'ò nù mu oshi, mu e-gude rùà ɔnu-ɔguzo a-gbabe-a-dzuru l'iku eze-ùlo Nchileke; mɛ oshi, mu e-gude kpù-kwazi ɔpho-mkpuma mkpùkpù ono; mɛ ɔphu mu e-gude mee ɔlo ɔphu mu e-buru." Eze emekotaru mu iphemiphe ɔbule, mu rɔru iya; kɛ l'ɛka-ɔma kɛ Nchileke mu; bɛ nɔ swiru mu nù.

*Nehemáya agbaphe ɔpho-mkpuma
Jerúsalemu*

⁹ Mu erua; bya eworu ɛkwo ono, eze deru ono keeru ndu ɔvono azù ɛnyimu Yufurétusu. Eze bɛ duru ndu ishi ndu soja; mɛ ndu ɔnya-ɔgu yeru mu; tɛ mu l'ɛphe yiru. ¹⁰ Teke Sambálatu, bɛ onye Hɔronu; mɛ Tobaya, bɛ onye ishi l'alì Amɔnu nùleruphu l'ò nweru onye byaru ɔcho ɛge ee-shi t'iphe duru ndu Ízurelu lɛ mma; yɔ dɔa ɛphe ɛji dushia ya ɛphe ike.

¹¹ Ya ndono; mu abya abata lɛ Jerúsalemu; nɔo ya abalì ɛto. ¹² Yo be l'ɛnyashi; mu agbalihu; mu l'unwoke olemole; tɔgbua. ɔphu ɔ dudu onye mu kfuwaru iphe, Nchileke mu yeru mu l'obu tɛ mu meeru Jerúsalemu. ɔphu ɔ dukwaphu anù ɔdo, mu gude ɔdo; gbahaa nkakfù-ìgara-wa, mu agba agbagba-wa. ¹³ ɔ bɛ l'echi-abalì bɛ mu gude tɔgbua. ɛke mu shiru bɛ ɔnu-ɔguzo Nsuda lɔfuta lɛ Wɛlu Nkùta-ɔswa; shia ono lɔfuta lɛ ɔnu-ɔguzo Ikpɔzu. Mu ejekpelephu l'agbaphe ɔpho-mkpuma Jerúsalemu ono, e tsukposhiru etsukposhi ono yɛle edukfu iya ono, ɔku tsukotaru ono. ¹⁴ Mu abya eshi l'ɛke ono tɔgbua shia ɔzo ɔnu-ɔguzo ɛnya-nwogvu; waa Okpuru Eze. ɔle nkakfù-ìgara, mu agba

agbagba te nwedu eke oo-shi sweta. ¹⁵ Tọ dụ iya bụ; mu egude ẹnashi ono tųgbua kwaseru ụzo nsụda; l'agbaphe ụpho-mkpuma ono. Mu agbaphegee ya; bya alaphuta azụ; shia Ọnu-ọguzo Nsụda bahu l'ime mkpukpu.

¹⁶ Ọphu ndu ishi te nwedu onye maru eke mu jeru; tọ dụ onye maru iphe, mu meru. Ishi iya aburu lẹ jeyekpo teke ono; b'ẹ t'ọ dudu iphe, mu kfuwaru ndu Júda; ndu achijeru Nchileke eja; ndu a maru epha epe; ndu ishi; męwaru ndu ọdo, bụ ndu e-mekochaa eje ozi ono.

¹⁷ Tọ dụ iya bụ; mu asụ epe: “Unu phuwaru egbe iphe-ehuka, ayi nọ l'ime iya; mbụ ege Jerúsalemu gude dakposhihu; ọku etsukota edukfu iya. Unu byakwa t'ayi kpukwaa ụpho-mkpuma Jerúsalemu; k'ọphu ayi e-mefu onwayi iphere l'ifu.” ¹⁸ Mu abya ekfukwaaruphu epe ege eka-oma kẹ Nchileke mu gude dụ-be mu l'ehu; mę k'iphe, eze kfukotaru mu. Epe asụ: “Ngwaa; t'ayi wata iya akpukpu.” Epe akwakọbelahaa k'ọru ono.

¹⁹ Sambálatu, bụ onye Họronu yele Tobaya, bụ onye ishi l'alị Amọnu; mę Geshemu, bụ onye Arabu anulephu iphe ono, ayi chiru idzu k'ememe ono; epe achilaha ayi ọchi; jalaha ayi ewena; sụ: “?Bụ ngunu bẹ ayi eme ege ono? ?Bụ ikè bẹ ayi ekwefuru eze tọ?”

²⁰ Mu abya eyeeru epe onu; sụ epe: “Lẹ Nchileke k'imigwe e-me-e t'ọru ayi gaa werewere. Ayibe ndu ozi iya a-wata ọkpu-kwazi ụpho-mkpuma ono; ọbu l'unubedua te enwekwa okè lẹ Jerúsalemu; tọ nwe iphe e-rube unu eka; tọ nwe iphe ee-gude anyata unu.”

3

Ndu akpukwa upho-mkpuma Jerúsalemu

¹ Ya ndono; Eliyashibu, bu onye ishi ndu achijeru Nchileke eja; me ndu odo, bu ndu achijeru Nchileke eja egbeshi je akpukwaa Onu-oguzo Aturu. Epe akpu-gee ya; bya eyeshia ya ibo. Epe kpuru upho-mkpuma iya; yo lufuta le Ulo-eli Ukporo-ise; me le Ulo-eli Hananelu. Epe emeebe bya eworu iya ye Nchileke l'eka.

² Ndu kpuru tsota Eliyashibu bu unwoke Jeriko.

Onye kpuru tsota epe aburu Zaku Imiri.

³ Unwu Hasena bu epe kpuru Onu-oguzo Ema. O bu epe gbaru oshi l'eli iya; yeshia ya ibo; akpobe; me mgboro-igwe.

⁴ Onye kpuru tsota epe bu Meremotu Uraya Hakoza.

Meshulamu Berekaya Meshezabelu bu iya kpuru-tsotaru Meremotu.

Zedoku Bena akpu-tsota Meshulamu.

⁵ Ndu Tekowa kpuru eke etsota iya nu. O le ndu ophu a maru epha epe le mkpukpu ono te kwedu ye eka l'ozi, ndu ishi-oru suru t'epe jee.

⁶ Joyada Paseya; me Meshulamu Besodeya bu epehedua kpukwaru Akahu Onu-oguzo. Epe gbaru oshi l'eli iya; yeshia ya ibo; akpobe; me mgboro-igwe.

⁷ Ndu kpuru tsota epe bu Melataya, bu onye Gibiyonu; Jadonu, bu onye Meronotu; unwoke Gibiyonu; me unwoke Mizupa. Eke ono bukota eke ndu govano azu Enyimu Yufurusu achi.

⁸ Onye kpuru tsota ephe bu Uziyelu Hahaya. Uziyelu tso le ndu uzu mkpola-ododo.

Onye kpuru tsota iya nu aburu Hananiya. Hananaya tso le ndu emeje manụ-mbeleke, eshi mkpọ. Ephe kpuru upho-mkpuma ono jeye le Obosara Upho-mkpuma.

⁹ Refaya Huru be kpu-tsotaru ephe. Refaya bu onye ishi, l'achi nkere-ebo lanu le Jerusalemu.

¹⁰ Onye kpu-tsotaru ephe bu Jedaya Harumafu. Eke o kpukwaziru bu nhamunha iku ufu iya.

Hatushi Hashabuneya akpukwaa eke tsotaru iya nu.

¹¹ Malukija Harimu; me Hashubu Pahatu-Moabu be kpukwaru upho-mkpuma ono ibyiya odo; bya akpu Ulo-eli Oku-Uzu.

¹² Onye kpukwaru eke tsotaru iya nu bu Shalumu Haloheshi. O bu onye ishi, l'achi nkere-ebo lanu le Jerusalemu. Yo buru unwu iya: ndu k'unwanyi yetaru eka kpu ya.

¹³ Hanunu yele ndu bu le Zanowa bu ephe kpukwaru Onu-oguzo Nsuda. Ephe kpuru iya; yeshia ya ibo; akpobe; me mgboro-igwe. Ephe kpukwaruphu upho-mkpuma ono eke du unu nkwo-eka labu l'ukporo nkwo-eka iri; kpu ya jeye le Onu-oguzo Ikpuzu.

¹⁴ Onye kpuru Onu-oguzo Ikpuzu bu Malukija Rekabu, bu onye l'achi Betu-Hakeremu. O kpuru iya yeshia ya ibo; akpobe; me mgboro-igwe.

¹⁵ Shalumu Kolu-Hoze, bu onye ishi, l'achi Mizupa bu iya kpukwaru Onu-oguzo Nwogvu. O kpuru iya; kpu ya iphe; bya eyeshia ya ibo; akpobe; me mgboro-igwe. O kpukwakwaruphu

upho-mkpuma Okpuru Sayilówamu l'iku Mg-babu Eze; kpua ya lufuta l'ubube ulo-eli, eeshije le Mkpukpu Dévidi nyizita enyizita.

¹⁶ Onye kpuru tsota iya nu bu Nehemáya Azubuku, onye bu onye ishi, l'achi nkere-ebo Bétu-Zu. O kpuru upho-mkpuma ono je akpaa l'ifu ili Dévidi; kpua ya jeye l'okpuru ono, e gude eka tua ono; me l'ulo eke ndu soja bu.

¹⁷ Ndu kpuru tsota Nehemáya bu ndu Lívayi. Onye epehe no l'eka kpua ya bu Rehumu Bani.

Onye kpuru tsota Rehumu bu Hashabaya, bu onye ishi, achi nkere-ebo Keyila. Hashabaya ono be bu nkere-ebo eke ochi b'o kpu-chitaru upho-mkpuma ono.

¹⁸ Onye tsotaru iya nu bu Bavayi Henadadu, bu onye achi nkere-ebo Keyila lanu ophu yele unwunna iya.

¹⁹ Onye kpuru tsota iya nu bu Eza Jeshuwa. O kpukwaru ibyiya ophu no l'ifu eke eeshije enyi-iba l'ulo, eedobeje ngwa-ogu; mbu le nkulahu ngwo-ji upho-mkpuma ono. Eza l'onwiya be bu onye ishi, achi Mízupa.

²⁰ Onye tsotaru iya nu bu Baruku Zakayi. O gude ege oovu iya l'ehu kpukwaa ya. O shi le ngwo-ji upho-mkpuma ono kpua ya jeye l'onu nggamgbo Eliyashibu, bu onye ishi ndu achijeru Nchileke eja.

²¹ Meremotu Uráya Hakožu be kpuru tsota Zabayi. O shi l'onu nggamgbo Eliyashibu kpua ya jeye l'eke ufu Eliyashibu jeberu.

²² Ndu odo, kpuru tsota iya nu bu ndu l'achijeru Nchileke eja, shi le mkpukpu, no-pheru Jerúsalemu mgburumgburu.

²³ Ndu ọdo, kpuru tsota ẹphe bu Bénjaminu me Hashubu. Eke ẹphe kpukwaru bu onu-nggamgbo ẹphe.

Onye kpuru tsota ẹphe bu Azaríya Maseya Ananiya. Eke ẹphebedua kpukwaru bu eke, no l'onu-nggamgbo ẹphe.

²⁴ Binuyi Henadadu be kpuru tsota Azaríya. Yẹbedua kpuru shita l'ufu Azaríya jeye l'iku ngwo-ji upho-mkpuma ono.

²⁵ Palalu Uzayi be kpukwaru eke no l'ifu ngwo-ji upho-mkpuma ono; yele ulo-ephekerephe ono, sefutaru ishi l'ufu-eze l'eka iya ophu no l'uzo imeli mkpukpu ono le mgboro echi eke ndu nche anoje.

Onye kpuru tsota iya nu bu Pedaya Paroshi.

²⁶ Ndu eje ozi l'eze-ulo Nchileke, bu ndu bu l'ugvu Ofelu abya akpukwaa nk'ẹphe lufuta l'ifu Onu-oguzo Mini, no l'uzo enyanwu-ahata yele ulo-ephekerephe ono, sefuru esefu ono.

²⁷ Ndu kpuru tsota ẹphe; bu unwoke ndu Tékowa. Ẹphe kpukwaru ifu oke ulo-ephekerephe ono, sefuru esefu ono; kpa ya je asube upho-mkpuma Ofelu.

²⁸ Ndu l'achijeru Nchileke eja be kpọtaru okpu upho-mkpuma ono le Onu-oguzo Inya kwaseru: onyenonu akpa onu-nggamgbo iya.

²⁹ Onye kpuru tsota ẹphe; bu Zédoku Ima. Yẹbedua kpukwaru onu-nggamgbo iya.

Onye ophu kpuru tsota iya nu aburu Shemáya Shekaníya. Yẹbedua bu onye nche Onu-oguzo Enyanwu-awawa.

³⁰ Ndu ọdo, kpuru tsota iya nụ bu Hananaya Shelemíya yele Hanunu, bu onye k'ishingu l'unwu Zalafu.

Meshulamu Berekaya kpuru tsota ephe; eke o kpukwaru aburu iku ulo iya.

³¹ Onye ophu kpuru tsota iya nụ bu Malukíja. Malukíja tso le ndu uzu mkpola-ododo. O kpukwaru upho-mkpuma ono jeye l'ulo ndu ozi leze-ulo Nchileke; me ke ndu ngho l'ifu Onu-oguzo Ndzuko; bya akpukwaa ya phu jeye le nwulo, no l'eli ngwo-ji upho-mkpuma ono.

³² Ndu uzu mkpola-ododo; me ndu ngho be kpukwaru mgbaku nwulo ono, no l'eli nkulahu ngwo-ji upho-mkpuma ono; ephe akpu ya jeye le Onu-oguzo Aturu.

4

Ndu akposhi-oru ono akposhi

¹ Ya ndono; Sambálatu anulephu l'ayi akpukwawa upho-mkpuma ono; ehu agbangahu iya; yo voru oku ghua ehu wata oja ndu Ju ewena. ² Yo nodu l'ifu ndu otu iya; me l'ifu ndu soja Samériya kfulahaa; su: “?Bu ngunu be ndu Ju-wa, uvo ta nodu-a etu onwephe? ?Epe ari l'ephe e-gude ujiku lanu kpukwaa upho-mkpuma ono; nodu iya gwoo ngweja mboku ono to? ?Epe a-du ike mee te mkpuma ono dubaa mma odo; mbu mkpuma ono, ephe voshiru le mkpokpo upho-mkpuma ono, oku mebyishiru emebyishi ono to?”

³ Tobaya, bu onye Amonu, nonyabe iya nu asu: “Upho-mkpuma obu, ephe akpu obu; ?o

nweru ishi? Iphe bu; agụ-ụlo -gbakobe iya; yọ dakpòshihu!”

⁴ Mu abya ekfuru nù Nchileke; sù iya: “Byiko Nchileke ayi; ngabènurú ayi nchị; kẹ l'ẹ tọ dudu iphe, a guberu ayi. Menua tẹ ewena-a, ẹphe aja ayi-a tukoru ẹphe l'ishi. Nggú emee t'a lùta ẹphe l'ọgu lashia alì ọdo. ⁵ Ba agụkwaru ẹphe nvù l'ẹge ẹphe gude katòshia ndu ono, akpụkwa ụpho-mkpuma ono; shi iya kpatsua ngu iwe ono.”

⁶ Ya ndono; ayi abya akpụ ụpho-mkpuma ono jeye yo rua nkere-ẹbo l'ẹge eli iya shi hahawa; kẹ lẹ ndu ono fuberu ifu jee ozi ono.

⁷ Sambálatu; Tobaya; ndu Arabu; ndu Amọnu; mẹ ndu Ashudọdu anụlephu lẹ ndu akpụkwa ụpho-mkpuma Jerúsalemu ono akpụ l'iya-a l'eje; yeru l'ẹke ụzo nọtsua ya bẹ ẹphe emechishitsua; ẹhu agbanwushihu ẹphe ọku. ⁸ Ẹphe abya achia idzu t'ẹphe bya ọgu lẹ Jerúsalemu; kuru utsu kpua ya. ⁹ Tọ dụ iya bu; ayi abya ekfuru nù Nchileke ayi; woru ndu nche ye t'ẹphe cheje mkpụkpụ ono nche: eswe l'enyashi; t'e gude nọchia ẹphe ụzo abyabya.

¹⁰ Yọ bụru teke ono bẹ ndu Júda wataru okfu; sù: “L'ike gvụakwaru ndu l'eje ozi ọbu; yefuaru lẹ mkpọkpo ụpho-mkpuma ọphu ghataru aghata; k'ọphu bu l'ẹphe ta aduhedu ike ọkpukwa ụpho-mkpuma ọbu.”

¹¹ Ndu ọhogu ayi l'ekfukwaphu l'ayi bya amaru; mbụ l'ayi bya aphụ ẹphe; bẹ ẹphe nọwa ayi l'echi; gbushia ayi; kẹ ọru ono ebuhu. ¹² Ugbo olemole bẹ ndu Ju, bunyabe ẹphe byawaru ayi okfuru l'iphe bu ẹke ayi shiru bẹ ndu ọhogu

ayi ono e-tsokwaruphu ayi bya. ¹³ To dü iya bu; mu abya eye ndu nche l'azu upho-mkpuma ono; t'ephe cheje nche l'eke a kpu-beru upho-mkpuma ono ubele. Mu abya agbaa ndu nche ono l'ikfu l'ikfu; ephe apagbaaru ogu-mbeke; me arwa; me akfu.

¹⁴ Mu aphutsua ege iphe dü; bya ekfuaru ndu a maru epha ephe; ndu ishi; mewaru ndu odo; su ephe: "Unu ba atsukwa ndu-a egvu! Unu nyatakwa Nnajiufu ono, bu onye paru eka apaa; bya aburu onye dü egvu ono; gude iya lua ogu ehu ndibe unu; unyomu unu; unwu unu; me ndu ufu unu." ¹⁵ Teke ndu ohogu ayi nuru l'ejo idzu ono, ephe chiru ayi ono be ayi mawaru; mbu le Nchileke mebyiwaru iya; ayi l'ayi ha alaphu azu je akpulahaa upho-mkpuma ono odo. Onyenonu emelaha eka iya nkiya l'oru ono.

¹⁶ Tsube mboku ono kwaseru be buwaa nkere-ebo l'unwoke, ejeru mu ozi jelahaaru ozi ono; nkere-ebo ophu anodu le nche; paru arwa; iphe, eegudeje egbobuta onwonye; akfu; me uwe-ogu. Ndu ishi evudoshia ndu Jüda ono l'ephe ha ike l'azu; ¹⁷ ephe akpu upho-mkpuma ono. Ndu ophu evu iphe, eegude eje ozi ono egude eka lanu l'eje ozi ono; gude eka ophu paru ngwa-ogu. ¹⁸ Ndu ophu akpu upho-mkpuma ono l'ehu l'ehu etugbaaru ogu-mbeke ephe l'ukfu. Onye ke upyoku evudonyabe mu. ¹⁹ Mu abya ekfuru yeru ndu ono, a maru epha ephe ono; ndu ishi; mewaru ndu odowaru; su ephe: "L'ozia hakwa nshinu; gbasaa agbasa; shi ege ono mee; ayi anodugbaa onwayi ote-enya l'upho-

mkpuma-wa. ²⁰ Iphe, bu ẹke unu nuru o da upyoku ono; unu awuru byakfuta ayi l'ẹke ono. Nchileke ayi a-luchiru-a ayi oḡu!" ²¹ Ono ẹge ayi shi ru a oru ono: nkere-ẹbo apajẹ arwa l'ẹka tsube lẹ nchi-aboḡu jeye teke mkpo-kpodo a-fushi l'urenyashi ²² Iphe odo, mu kfukwaruphu ndu ono teke ono bu: "T'onyenonu yele onye ejeru iya ozi noḡujekwa lẹ Jerúsalemu l'enyashi; k'ophu ẹphe a-buru ayi ndu nche l'enyashi; teke o beru l'eswe; ẹphe ejee ozi." ²³ Lẹ ayi ha: mbeḡdua; unwunne mu phe; ndu ozi mu phe; me ndu nche mu l'ẹphe ha te nweḡdu onye eyefuje iphe, o yeru l'ẹhu eyefu. Onyenonu apajeru ngwa-oḡu iya; m'o -ruhuru; o buru mini be onye oḡu eje ekuta.

5

Nehemáya eyeru ndu ukpa ẹka

¹ Ya ndono; unwoke ndu Ju me unyomu ẹphe awata ochi mkpu iphe, ndu Júda ibe ẹphe eme ẹphe. ² O nweru ndu oḡu suru: L'ẹphe l'unwegirima ha igwe. Oo ya bu t'a hanu a ẹphe t'ẹphe kpata nri ria noḡu ndzu.

³ O nwekwaruphu ndu oḡu suru: "L'ẹphe yeru ali ẹphe l'itumo; jeye lẹ mgbo vayinu ẹphe; me uo ẹphe ẹge ee-shi t'ẹphe phu a nri ria teke phu ẹgu shi eme phu."

⁴ O nwekwaruru ndu oḡu suru: "L'ẹphe jiwaru jia ugwo nu eze; gude tu a utu ali ẹphe; me utu mgbo vayinu ẹphe. ⁵ A makwaru-a l'ẹphe lẹ ndu Ju ibe ẹphe bu ndu lanu. O bu ẹge unwegirima ẹphe ama mma; be unwegirima

nk'ayi amakwaphu. Obenu l'ụnwegirima ayi b'e dobewaru l'ọnodu ndu bụ ohu. Ụphodu ụnwegirima ayi ndu kẹ ụnwanyi nwekwaru ndu ọphu gbe bụwaru nụ ohu nta-a; ayi ta ma ẹge ayi e-me gbafuta ẹphe; kẹ l'alị ayi; mẹ mgbo vayinu ayi bụkotawa kẹ ndu ọdo.”

⁶ Teke mu nuru mkpu ono, ẹphe echi ono yẹle iphe ono, ẹphe ekfushi ono; ẹhu agbanwuhu mu ọku. ⁷ Mu abya ariebe iphe ono l'ime onwomu; bobo iya ndu a maru ẹpha ẹphe; mẹ ndu ishi. Mu asụ ẹphe: “?Nanụ ẹge unu e-shi ana ndu Júda ibe unu ọ-mụru-nwa?” Mu abya ekua ndzuko, ha shinu t'a chĩa ẹge ee-shi meshia ẹphe ike. ⁸ Mu asụ ẹphe: “Ayi sewaru jeye teke ayi gbafutaru unwunne ayi, bụ ndu Júda, e shi reshia ndu ọhodo. Nta-a bẹ unu byaru bya ereshilaha unwunne unu ono ọdo tẹ ayi zụ-phulaha ẹphe azụ.” Mu ekfuebe ẹge ono; ẹphe adaa shikongu; ẹphe ta amahẹ iphe, ẹphe e-kfu.

⁹ Mu asụkwaphu ẹphe: “L'iphe, unu eme ta dukwa mma. ?Tọ gbadu t'unu tsua Nchileke ayi egvu; k'ọphu ndu ọhodo, bụ ndu ọhogu ayi ẹ ta watadu ayi oja ewena? ¹⁰ Mbẹdua; unwunne mu phẹ; mẹ ndu ozi mu phẹ ejejekwaa ndibe ayi ụgwo okpoga mẹ ụgwo nri. Ọlobu; tẹ kẹ ọ-mụru-nwa lakwaa! ¹¹ Unu nụ-phukota ẹphe alị ẹphe azụ ntanụ-a; mẹ mgbo vayinu ẹphe; mgbo olivu ẹphe; mẹ ụlo ẹphe. Unu eworu ọ-mụru-nwa, unu nataru ẹphe l'okpoga; lẹ nri; lẹ mее; mẹ lẹ manụ nụ-phukota ẹphe azụ.”

¹² Ẹphe atuko sụ: “L'ẹphe a-nụ-phukota iphe ono azụ. Ẹ tọ dudu iphe, ẹphe a-sụba t'a nụ ẹphe

odo. O bulephu ege mu suru t'ephe mee be epe e-me.”

Mu abya ekua ndu achijeru Nchileke eja; su ndu ono, a maru epha epe ono; me ndu ishi t'ephe nodu epe l'ifu ria nte; l'ephe emee iphe ono, epe kweru ukwa iya ono. ¹³ Mu abya aja uwe mu kpaphungu; su: “T'o bukwaru ege ono be Nchileke a-jifu iphe, bu onye e-te medu iphe-a, o kweru ukwa-a; mbu jifu iya l'ulo iya; me l'iphe, onye obu nweru enweru. T'o bukwaru ege ono bu ege aa-jifu onye ono; gbase iya eka otu!”

Ndu ono l'ephe ha atuko za mgbede; su t'o dukwa ege ono; metsua bya ajaa Ojejoje ajaja. Ndu ono emee iphe ono, epe kweru ukwa iya ono.

Nehemáya ta budu o-maru-onwiya

¹⁴ Tsube le teke e meru mu govano ndu Júda; mbu l'afa, kwe Atakusakusesu ukporo afa jeye l'afa, kwe iya ukporo afa l'afa iri l'ebo, o wataru obu eze; l'ime afa iri l'ebo ono; be mbedua; me unwunna mu ta dudu onye ophu rijeru nri, gbaru govano. ¹⁵ Obenu le ndu govano ophu vu mu uzo chia be shi bo ndu Júda ivu-era: shi ana epe nri; me mee; yeru shekelu mkpola-ocha ukporo labu, epe shi atuje l'uboku. O kwaphu ege ono be ndu shi ejeru epe ozi shi akpa ndu Ju ehu. Ole mbedua gude otsu egvu Nchileke; mu te me ege ono. ¹⁶ Mu gbe yechiaru ehu le k'okpu upho-mkpuma ono; ophu o dudu ali, ayi zuru m'oo nanu. Ndu ozi mu l'ephe ha achikotaleruphu eka wua l'ozi ono. ¹⁷ Odo aburu l'ukporo ndu Júda esaa l'umadzu iri; me

ndu bu ndu ishi be shi abyaje ori nri le nke mu; yeru ndu eshije iphe, bu mbakeshi, no-pheru ayi mgburumgburu byakfuta ayi. ¹⁸ Mboku-mboku be eegbuje oke-eswi lanu; waa aturu ishingu, ehu du mma; me oku; gude shiaru mu nri. Iphe bu abali iri, sweru esweswe be eevutajeru mu mee, du iche iche; vuta iya k'etsutsu iya. A makwaru-a l'iphemiphe obule ono nokota; obu le mu ta asubukwaa t'a nu mu oke-nri, ruberu govano. Ishi iya aburu le ivu-era ndu Jüda vu be hawa nshinu.

¹⁹ Mu abya ekfuru nu Nchileke; su iya t'o nyatakwa mu ru le k'iphemiphe obule ono, mu mekotaru ndu-wa ono.

6

Ejo idzu, aachiru Nehemáya

¹ To du iya bu; Sambálatu; Tobaya; Geshemu, bu onye Arabu; me ndu ohogu ayi odo abya anua le mu kpu-ghewaru upho-mkpuma ono; l'e to duhedu eke ghekwaduru iya onu; a gufu le teke ono be mu te yeshidua ibo l'onu-oguzo iya; ² Sambálatu yele Geshemu ezia te mu bya te mu l'ephe nwee ndzuko le mkpukpu lanu l'obosara ali Ono. Obenu l'iphe, ephe chiru idzu iya bu t'ephe merua mu ehu. ³ Ya ndono; mu ezifu ndu ozi t'ephe je ezia ephe: "L'ozu, mu gude l'eka hakwa l'uru. Le mu ta abyaghekwa. ?Nanu ege mu e-shi paru ozi ono haa; le mu eje ephe oza oku?"

⁴ Ugbo eno be ephe ziru mu ozi lanu ono. Yo buru onu ono, mu yehawaru ephe ono be mu yekotaru ephe.

⁵ Yo be lẹ k'ugbo ise ya; Sambálatu eye nwozi iya t'o gude ẹkwo, o deru; ghebe iya ọnu; nụ iya t'o wotaru mu. ⁶ L'ime ẹkwo ono b'o deru; sụ:

“Iphe ada nụ l'iphe bụ mbakeshi bụ lẹ nggu lẹ ndu Ju bẹ achi idzu t'unu kwefu íkè. Geshemu agbakwa ama l'ọ bụ oswi-okfu. Yọ bụru iya meru iphe unu akpụkwa ụpho-mkpuma ono. Iphe ọdo, e kfulu ye iya bụ l'ọo mbẹdua eme tẹ mu bụru eze ẹphe. ⁷ Ọdo aburu lẹ mu gbe fọtawa ndu nkfuchiru t'ẹphe je araa ya arara lẹ Jerúsalemu l'ọ bụwa mu bụ eze ndu Júda. Wo; ọo doru mu-a ẹnya l'okfu ono e-rukwa eze nchi. L'ọ kakwa mma tẹ bya tẹ ayi chi-zia ya achi-zi.”

⁸ Mu eziphu iya ozi azụ; sụ iya: “L'iphe ono, ookfu ono ta dukwa ọphu bụ oswi-okfu; l'ọ kwa iphe ọ ritaru l'obu iya bẹ ookfu.”

⁹ Iphe ono bụ iphe, ẹphe eme te ayi tsuhu egvu; ke l'ẹphe riru l'ayi a-paru ozi ono haa; ayi te ejefuhe iya l'ishi. Ọle mu rọru Nchileke; sụ iya: “Byiko; menua te ẹka shihu mu ike.”

¹⁰ Yo be teke mu jeru l'ụlo Shemáya Delaya Mehetabelu, bụ onye e bufuru ebufu; yọ sụ tẹ mu l'iya dzuda l'eze-ụlo Nchileke; l'ime ime eze-ụlo ono; tẹ ayi gụ-chishia ibo eze-ụlo ono agụ-chishi; l'o nweru ndu a-bya mu egbugbu; l'ọo l'enyashi bẹ ẹphe a-bya.

¹¹ Mu aja; sụ: “?Bụ onye dụ l'ọ bụ mbẹdua a-bya agbalahaa ọso? Mbu: ?bụ onye dụ l'ọ bụ mbẹdua a-gbaru lashia l'eze-ụlo Nchileke tẹ mu dzọta ndzụ mu tọ? Lẹ mu te ejekwa.”

¹² Yọ bụru teke ono b'ọ byaru bya edoo mu ẹnya l'ẹ t'ọ bụdu Nchileke bẹ ziru iya nụ; l'ọo Tobaya yẹle Sambálatu kfulu iya ụgwo t'o kfu

iphe, a-tsuru mu nu. ¹³ Ẹphe kƒuru iya ugwɔ t'ɔ yee mu egvu; k'ɔphu mu e-me iphe, ɔ sɔru tɛ mu mee; shi ɛge ono mee iphe, du eji; t'ɛphe nweru iphe, ɛphe agbabe ɔkpa gube mu ejo ɛpha; mee mu iphe-iphere.

¹⁴ Mu abya ekfuru nu Nchileke; su iya: “Nggube Nchileke mu; ba azahakwa iphe, Tobaya yele Sambálatu meru mu. O kwaphu ɛge ono b'ɛ tii zahadu nwanyi nkƒuchiru ono; mbu Nówadiya; me ndu nkƒuchiru ɔdo, shi eme t'ɛphe yee mu egvu.”

A kpɔ-gheru upho-mkpuma ono

¹⁵ Ya ndono; iphe, a kpuru upho-mkpuma ono bu ukporo abali labu l'abali iri l'ɛbo. Mboku, a kpɔ-gheru iya bu l'ukporo abali l'abali ise l'onwa Elulu. ¹⁶ Teke ndu ohogu ayi l'ɛphe ha; me iphe bu mbakeshi, bupheru ayi mgburumgburu nuru iya; be ɛphe pehuru onwɛphe l'ɛnya; ke l'o bya edoo ɛphe ɛnya l'ozi ono bu Nchileke ayi yeru ayi ɛka; ayi ejefu iya l'ishi.

¹⁷ L'ogege ono be ndu a maru ɛpha ɛphe l'ali Júda; ɛphe le Tobaya shi anɔduje edegba ɛkwo. ¹⁸ Ishi iya aburu l'igweligwe ndu Júda be riru nte turu ikè yeru iya; ke l'o bu ogo Shekaníya Ara. Nwatibe iya ke nwoke ophu aza Jehohananu alukwaphu nwatibe Meshulam Berekaya. ¹⁹ Ẹphe anɔdujekwaphu ekfuru mu iphe, du mma, Tobaya l'emebe. Teke o - nweru iphe mbedua kƒuru; ɛphe atututa iya je edooru iya. Tobaya l'edetajeru mu ɛkwo tɛ ya gude yee mu egvu.

7

¹ A kpụ-getsulephu ụpho-mkpuma ono; mu abya eyeshikota iya ibo; bya afōo ndu nche ọnu-oguzo; ndu egvu; mę ndu Lívayi. ² Mu abya ewota Hanani, bụ nwunne mu mee ya ishi lę Jerúsalemu. Hananaya bę mu yeru ụlo ngwa-ogụ l'ęka. Ishi iya aburu lę Hananiya bụ onye e gude ire iya ęka; bya aburu onye atsu Nchileke egvu karia igweligwe ndu ọdo. ³ Iphe, mu kfuru ęphe bụ: “T'ę b'ọ dukwa ọnu-oguzo, eeshi abata Jerúsalemu ọphu aa-guhaje aguha jeye teke ęnyanwu hawaru ọhuma. Teke ndu nche nọkwadu lę nche; t'a guchishijee ibo iya aguchishi; swọbetsua ya akpọbe. Unu shi lę ndu, bu lę Jerúsalemu fọta ndu nche; t'ęphe nọduje l'ęke, du k'оче nche; ndu ọphu anọduje lę nche l'ifu ụlo ęphe.”

Ndu, a kpuru lę ndzụ alata

(Ézu 2:1-70)

⁴ Jerúsalemu bụ eze mkpukpu, ha nshinu. Ọ bụ lę ndu bu iya nụ ta badu nwishi; ta watawaa ọkpukwazi ụlo ono. ⁵ Tọ du iya bụ; Nchileke mu eye mu iya l'obu tę mu ku-kọo ndu a maru ępha ęphe; ndu ishi; męwaru ndu ọdo; t'e deshia ępha ęphe l'eri ęphe l'eri ęphe. Mu abya aphua ękwo, e deshiru ępha ndu vuru uzo, shi l'ęke a kpuru ęphe lę ndzụ lata; mbụ ękwo, e deshiru ępha ęphe l'eri ęphe l'eri ęphe. Iphe, mu phuru, e deru l'ękwo ono bụ:

⁶ Ọwaa ndu Ízurelu ono, shi lę Bábyilonu lata ono; mbụ ndu ono, a kpujeru lę ndzụ laa alı ọdo; mbụ ndu Nebukadineza, bụ eze

ndu Bábyilonu kpukojeru laa Bábyilonu. Ēphe latatsuaru Jerúsalemu; mē Júda. Onyenõnu alatsua mkpukpu ēke o shi. ⁷ Ndu ēphe tso lata bu Zerúbabelu; Jeshuwa; Nehemáya; Azariya; Ramáya; Nahamani; Mõdekáyi; Bilishanu; Misuperetu; Biguvayi; Náhumu; mē Bena.

Owaa ēge ndu Ízurēlu ono ha ndo-õ:

- ⁸ Ndibe Paroshi du
 unu madzu ise
 l'ukporo madzu esato
 l'umadzu iri l'ebo.
- ⁹ Ndibe Shefatiya du
 ukporo madzu iri l'esato
 l'umadzu iri l'ebo.
- ¹⁰ Ndibe Ara du
 unu madzu
 l'ukporo madzu iri l'ebo;
 l'umadzu iri l'ebo.
- ¹¹ Ndibe Pahatu-Móabu,
 bu iya bu ndu shi l'eri
 Jeshuwa yēle Jóabu du
 unu madzu esaa;
 l'umadzu iri l'esato.
- ¹² Ndibe Élamu du
 unu madzu eto;
 l'ukporo madzu labu;
 l'umadzu iri l'eno.
- ¹³ Ndibe Zatu du
 unu madzu labu;
 l'ukporo madzu labu;
 l'umadzu ise.
- ¹⁴ Ndibe Zakayi du
 unu madzu;

- l'ụkporo madzụ iri;
lẹ madzụ ẹsato.
- 15 Ndibe Binuyi dụ
unu ụmadzụ;
l'ụkporo madzụ iri l'ẹbo;
l'ụmadzụ ẹsato.
- 16 Ndibe Bebayi dụ
unu madzụ;
l'ụkporo madzụ iri lẹ nanụ;
l'ụmadzụ ẹsato.
- 17 Ndibe Azụgado dụ
unu madzụ ise;
l'ụkporo madzụ
iri l'ishingu; l'ụmadzụ labụ.
- 18 Ndibe Adonikamu dụ
unu madzụ;
l'ụkporo madzụ iri l'ẹto;
l'ụmadzụ ẹsaa.
- 19 Ndibe Biguvayi dụ
unu madzụ ise;
l'ụkporo madzụ ẹto;
l'ụmadzụ ẹsaa.
- 20 Ndibe Adinu dụ
unu madzụ;
l'ụkporo madzụ iri l'ẹbo;
l'ụmadzụ iri l'ise.
- 21 Ndibe Ateya, bụ iya bụ
ndu eri Hezekáya dụ
ụkporo madzụ ẹno;
l'ụmadzụ iri l'ẹsato.
- 22 Ndibe Hashumu dụ
ụkporo madzụ iri l'ishingu;
l'ụmadzụ ẹsato.
- 23 Ndibe Bezayi dụ

- ụkporo madzụ iri l'ishingu;
 l'ụmadzu ẹno.
- 24 Ndibe Harifu dụ
 ụkporo madzụ ise;
 l'ụmadzu iri l'ẹbo.
- 25 Ndibe Gíbiyọnu dụ
 ụkporo madzụ ẹno;
 l'ụmadzu iri l'ise.
- 26 Unwoke, shi Bétulehemu;
 mẹ Netofa dụ
 ụkporo madzụ tete;
 l'ụmadzu ẹsato.
- 27 Ndu kẹ Anatoṭu dụ
 ụkporo madzụ ishingụ;
 l'ụmadzu ẹsato.
- 28 Ndu kẹ Bētu-Azụmavetu dụ
 ụkporo madzụ labụ l'ụmadzu labụ.
- 29 Ndu kẹ Kiriyatu-Jerimu;
 Kefira; mẹ Berotu dụ
 unu madzụ;
 l'ụkporo madzụ iri l'ẹsaa;
 l'ụmadzu ẹto.
- 30 Ndu kẹ Ráma; mẹ Géba dụ
 unu madzụ;
 l'ụkporo madzụ iri lẹ nanụ l'onye lanụ.
- 31 Ndu kẹ Mikumashi dụ
 ụkporo madzụ ishingụ;
 l'ụmadzu labụ.
- 32 Ndu kẹ Bételu; mẹ Eyayi dụ
 ụkporo madzụ iri lẹ nanụ l'ụmadzu ẹto.
- 33 Ndu kẹ Nébo ophunanu dụ
 ụkporo madzụ labụ;
 l'ụmadzu iri l'ẹbo.

- 34 Ndu kẹ Élamu ọphunanu dụ
 ọnu madzụ ẹto;
 l'ụkporo madzụ labụ;
 l'ụmadzu iri l'ẹno.
- 35 Ndu kẹ Harimu dụ
 ụkporo madzụ iri l'ishingu.
- 36 Ndu kẹ Jériko dụ
 ụkporo madzụ iri l'ẹsaa;
 l'ụmadzu ise.
- 37 Ndu kẹ Lodu; Hadidi;
 mẹ Ono dụ ọnu madzụ;
 l'ụkporo madzụ iri l'ishingu l'onye lanụ.
- 38 Ndu kẹ Senaa dụ
 ọnu madzụ tete;
 l'ụkporo madzụ iri l'ishingu l'ụmadzu iri.
- 39 A bya lẹ ndu achijeru Nchileke ẹja:
 Ndibe Jedaya,
 bụ iya bụ ndu shi
 l'ọnu-ulo Jeshuwa dụ
 ọnu madzụ labụ;
 l'ụkporo ẹsato l'ụmadzu iri l'ẹto.
- 40 Ndibe Ima dụ
 ọnu madzụ labụ;
 l'ụkporo madzụ iri l'ẹbo;
 l'ụmadzu iri l'ẹbo.
- 41 Ndibe Pashọ dụ;
 ọnu madzụ ẹto;
 l'ụkporo labụ l'ụmadzu ẹsaa.
- 42 Ndibe Harimu dụ
 ọnu madzụ labụ;
 l'ụkporo madzụ iri l'ụmadzu iri l'ẹsaa.
- 43 A bya lẹ ndu Lívayi:
 Ndu ufu Jeshuwa;
 mẹ Kadimiyelu, bụ iya bụ

- ndu shi l'eri Hodaviya dū
ųkporo madzū ęto; l'ųmadzu iri l'ęno.
- 44 A bya lę ndu egvu:
Ndibe Ásafu dū
ųkporo madzū ęsaa l'ųmadzu ęsato.
- 45 A bya lę ndu nche
ọnu-ọguzo:
Ndibe Shalumu;
ndibe Ateya;
ndibe Talumọnu;
ndibe Akubu;
ndibe Hatita;
mę ndibe Shobayi;
bę tųkoru dū
ųkporo madzū ishingu;
l'ųmadzu iri l'ęsato.
- 46 Ndu ozi l'eze-ųlo Nchileke bų:
Ndibe Ziha;
ndibe Hasufa;
ndibe Tabawotu;
- 47 ndibe Kiroso;
ndibe Siya;
ndibe Padọnu;
- 48 ndibe Lebana;
ndibe Hagaba;
ndibe Shalumayi;
- 49 ndibe Hananu;
ndibe Shalumayi;
ndibe Gaharu;
- 50 ndibe Reyaya;
ndibe Rezinu;
ndibe Nekoda;
- 51 ndibe Gázamu;
ndibe Uza;

- ndibe Paseya;
 52 ndibe Besayi;
 ndibe Meyunimu;
 ndibe Nefisimu;
 53 ndibe Bakubuku;
 ndibe Hakufa;
 ndibe Hahuru;
 54 ndibe Bazulutu;
 ndibe Mehida;
 ndibe Hasha;
 55 ndibe Bakõsu;
 ndibe Sizéra;
 ndibe Téma;
 56 ndibe Neziya;
 mę ndibe Hatifa.
 57 A bya lę ndibe ndu ozi Sólomõnu.
 Ephedua bu:
 ndibe Sotayi;
 ndibe Soferetu;
 ndibe Perida;
 58 ndibe Jala;
 ndibe Dakõnu;
 ndibe Gidęlu;
 59 ndibe Shefatíya;
 ndibe Hatilu;
 ndibe Pokeretu-Hazebeyimu;
 mę ndibe Amõnu.
 60 Ndu ozi l'eze-ulo Nchileke l'ephe ha;
 yeru unwu ndu ozi Sólomõnu dę
 ukporo madzų iri lę tete;
 l'umadzu iri l'ębo.
 61 Ndu owaa bu ndu ophu shi lę Tęlu-mela;
 Tęlu-Hasha; Kerubu; Adõnu; mę Ima la. O bu lę
 ndu onanu l'ephe ha ta dudu ike koshi õnu-ulo,

ẹphe shi; me ndu ufu onye ẹphe bu; k'ọphu ee-shi ẹge ono maru l'ẹphe bua ndu Ízurelu. ⁶² Ndu ufu Delaya; ndu ufu Tobíya; me ndu ufu Nekoda du unu madzu l'ụkporo madzu iri l'ẹbo l'umadzu labu.

⁶³ A bya le ndu ufu ndu achijeru Nchileke ẹja: ndu ufu Hobaya; ndu ufu Hakozu; me ndu ufu Bazilayi. Bazilayi luru nwatibe Bazilayi ke Gíledu; eekujewa iya ru ala l'ẹpha nna nyee ya ono. ⁶⁴ Ndu ono b'a choru ẹpha ẹphe l'ekwo, e deru ẹge e gude mushia ndu ufu ẹphe; ta phu iya. E woshia ẹphe t'ẹphe ba buhe ndu achijeru Nchileke ẹja; bya eworu ẹphe dobe l'ọ bu ndu mmeru no l'ehu. ⁶⁵ Gọvano asu t'ẹphe be etsojeshi ria nri, kakota ọdu nsọ jeye teke ee-nwe onye achijeru Nchileke ẹja, e-gude Urimu; me Tumimu kpata ishi.

⁶⁶ A -gukota ndu ono l'ẹphe ha; be ẹphe du ụkporo unu madzu ise l'unu madzu ise l'ụkporo madzu iri l'esato; ⁶⁷ a gufukwa ndu ozi ẹphe ndu k'unwoke; me ndu k'unwanyi. Ndu onanu du unu madzu iri l'esato l'ụkporo madzu ishingulu l'umadzu iri l'esaa. Ẹphe nwekwaruphu ụkporo umadzu iri l'ẹbo l'umadzu ise: unwoke l'unwanyi, bu ndu egvu; ⁶⁸ bya enweru unu inya l'ụkporo inya iri l'ishingulu l'inya iri l'ishingulu. Ẹphe nweru ụkporo inya-mulu iri l'ẹbo l'inya-mulu ise. ⁶⁹ Inya-kamelu ẹphe du unu l'ụkporo l'iri l'ise; bya enweru nkakfu-igara, du unu iri l'ishingulu l'ụkporo iri l'ishingulu.

⁷⁰ O nweru ndu bu ishi l'onu-ufu nna ẹphe, nuru iphe t'e gude yeta ẹka jee ozi ono. Gọvano

bẹ yeru ọnu mkpọla-ododo l'ụkporo mkpọla-ododo iri l'ụlo-ẹku; ụkporo efere labụ l'efere iri; mę uwe ndu achijeru Nchileke ẹja, dọ ọnu uwe l'ụkporo uwe ishingu l'uwe l'iri. ⁷¹ Ndu bụgbaa ishi l'ọnu-ufu nna ẹphe haru woru mkpọla-ododo, dọ ụkporo ọnu ugbo labụ l'ọnu iri; nọ t'e dobe l'ụlo-ẹku, ee-gudeje jee ozi ono; bya anọ mkpọla-ọcha, dọ ụkporo ọnu ugbo iri l'ẹto l'ọnu iri l'ise. ⁷² Mkpakọ iphe, ndu ọdo nọru dọ mkpọla-ododo, dọ ụkporo ọnu ugbo labụ l'ọnu iri; mę mkpọla-ọcha, dọ ụkporo ọnu ugbo iri l'ẹbo l'ọnu iri; mę uwe ndu achijeru Nchileke ẹja, dọ ụkporo ẹto l'ẹsaa.

⁷³ Tọ dọ iya bụ; ndu achijeru Nchileke ẹja; ndu Lívayi; ndu nche ọnu-ọguzo; ndu egvu; ndu ozi l'eze-ụlo Nchileke; męwaru ndu ọdo; yeru ndu Ízurelu l'ẹphe ha ebukotaru lę mkpukpu lę mkpukpu ẹphe.

8

Ézura aguru ndu ono ẹkwo ekemu Nchileke

¹ Yo rua l'ọnwa k'ẹsaa teke ndu Ízurelu bukotawa lę mkpukpu lę mkpukpu ẹphe; ẹphe l'ẹphe ha abya edzua l'edukfu, nọ l'ifu Ọnu-ọguzo Mini. Ẹphe asụ Ézura, bụ o-de-ẹkwo t'o wofuta ẹkwo ekemu Mosisu, bụ iya bụ ekemu ono, Ojejoje turu nọ ndu Ízurelu ono. ² Yo be l'abalị k'odungu l'ọnwa k'ẹsaa; Ézura, bụ onye achijeru Nchileke ẹja; ewofuta ẹkwo ekemu ono l'ifu edzudu-ọha l'ẹke unwoke; mę unwanyi; mę ndu mawaru iphe ekfu. ³ Yọ nọdu l'edukfu ono, nọ l'ifu Ọnu-ọguzo Mini ono gụa ẹkwo ekemu

ono l'ẹke unwoke me unwanyi; me ndu ophu mawaru iphe ekfu dzuru. O wataru iya agugu l'onma-ewa utsu; guya ya ege ono jeye l'echi oke-eswe. Edzudzu-oha ono angabe nchi ohuma l'iphe, ekwo ekemu ono ekfu.

⁴ Ezura, bu o-de-ekwo evudo l'eli eke e gude oshi gbaa ke mboku ono. Ndu vudo iya l'eka-utara bu Matitiya; Shema; Anaya; Uraya; Hilikaya; me Maseya. Ndu ophu vudo iya l'eka-ibyita aburu Pedaya; Mishelu; Malukija; Hashumu; Hashubadana; Zekarya; me Meshulam. ⁵ Ezura abya ekpuhaa ekwo ono; ephe aphukota iya; ke l'eke oovudo b'o kakota ndu ono l'eli. Teke o kpuharu iya be ephe tuko wulihu vudo evudo. ⁶ Ezura ajaa Ojejoje ajaja; mbu Nchileke ono, paru eka apaa ono.

Ndu ono achilikota eka ephe; zua su: "Ono kwa ege o du-o! Ono kwa ege o du-o!" Ephe efuzita kpubekota ifu l'ali; baaru Ojejoje eja. ⁷ Ndu Livayi, bu iya bu Jeshuwa; Bani; Sherebiya; Jaminu; Akubu; Shabetayi; Hodiya; Maseya; Kelita; Azariya; Jozabadu; Hananu; me Pelaya eyeta eka; mee te ekemu ono doo ndu ono enya l'ephe vudokwaduru l'eke ono. ⁸ Ephe agua iphe, no l'ekwo ekemu Nchileke ono; bya akowashia ya; mee iphe ono, a guru ono; yo dokota enya.

⁹ Govano Nehemaya; me Ezura, bu onye achijeru Nchileke eja; buru o-de-ekwo; me ndu Livayi, bu ndu ezi ndu ono ekemu ono abya ekfuru nu ndu ono; su ephe: "Le ntanu-a bukwa mboku, duru Ojejoje, bu Nchileke unu

nsọ. Unu ba agụkwa aphụ; ọpụ unu 'arakwa ẹkwa." Ishi iya aburu lẹ ndu ono l'ẹphe ha wataru ẹkwa l'ẹphe nuru iphe, ekemu ono kfulu. ¹⁰ Nehemáya asụ ẹphe: "T'ẹphe lawaru je eria ọkpobe nri; ẹphe angwa mee, l'atso rengerenge; ẹphe ahatakwapu je anụ ndu ọpụ ẹ-te enwedu ọpụ ẹphe e-ri. Ntanụ-a dukwaru Nnajiufu nsọ. Unu ba agushi aphụ; kẹ l'ọ kwa ẹhu-otso-ena ọpụ shi Nchileke l'eka bu ike unu."

¹¹ Ndu Lívayi egboo ndu ono; sụ ẹphe: "T'ẹphe nọdu ndoo; ẹphe ahaa ọgu aphụ; kele ntanụ bukwa mboku, du nsọ." ¹² Ndu Ízurelu l'ẹphe ha awukashihu lasha je eria; ngwa; wojetsuaru ndu ọdo nri; mbụ gude ẹhu-otso-ena gbaa aji ono; kẹ l'okfu ono, a guru ẹphe ono bẹ doru ẹphe ẹnya.

Aji Ada-Ékwa

¹³ Yo be lẹ mboku k'ẹbo ya; ndu ishi, shigbaa l'onu-ufu onu-ufu ndu Ízurelu; ndu achijeru Nchileke; me ndu Lívayi awuru bya ado-pee Ézura, bu o-de-ekwo mgburumgburu t'ẹphe mua iphe, ekemu ono kfulu. ¹⁴ Ẹphe aphụ l'e deru l'ekwo ono lẹ Ojejoje shi l'eka Mosisu tua ekemu sụ; lẹ ndu Ízurelu bẹ e-bujeru l'ime m̀kp̀ teke aagba aji k'onwa ẹsaa ono. ¹⁵ Ọdo aburu t'ẹphe raa ya arara; mee t'a nụ-dzuru iya lẹ mkpukpu ẹphe gbaa mgburumgburu; me Jerúsalemu; sụ: "T'ẹphe tugbua je l'ugvu je egbukoo ekali-oshi olivu; ekali-oshi payinu; kẹ m̀turu; ekwo igu; mewaru oshi ọdo, nweru ekwo; t'e gude tushia m̀kp̀, bu iya bu ẹge e deru iya l'ekwo ekemu ono."

16 Tọ dọ iya bụ; ẹphe atugbua je egbukoo ẹkali-oshi ono bya atushiaru onwẹphe m̀kpù. Onyenonu; yọ tọ nk'iya l'eli ọlo iya; l'ogbodufu iya; l'ogbodufu ọlo Nchileke; edukfu ono, nonyabe Onu-oguzo Mini ono; mẹ ọphu nonyabe Onu-oguzo Ifuremu. 17 Igwe-ọha ono, bụ ndu shi l'ẹke a kpuru ẹphe lẹ ndzụ lata ono bẹ atushikota m̀kpù ono buru. Ndu Ízurelu ta agbabua Aji Mkpù ẹge ono; shita l'oge kẹ Jóshuwa Nunu jeye mbọku ono. Ẹhu tsokpooru ẹphe ẹna nshinu.

18 Mbọku-mbọku; shita lẹ mbọku kẹ mbụ, a wataru ọgba aji ono jeye lẹ mbọku kẹ ikpazụ iya bẹ Ẹzura ndukotaru gụa ẹkwo ekemu Nchileke ono. Ẹphe gbaru aji ono abali ẹsaa; yo be lẹ mbọku k'ẹsato iya; ẹphe enwee ndzuko, bụ iya bụ ẹge ekemu kfuru iya.

9

Ndu Ízurelu ekfushi ẹjo iphe, ẹphe meshiru

1 Onwa ono agbalephu ukporo abali l'abali ẹno; ndu Ízurelu edzua; wata ọswi aswiwi. Ẹphe eyeshia uwe-aphu; kpotsuaru ẹja kpua onwẹphe l'ishi. 2 Ndu ọphu bụ ndu Ízurelu ekewafu onwẹphe l'ẹke ndu mbyamumbya nọ. Ẹphe evudo kfushikota ẹjo iphe, ẹphe meshiru; mẹ lẹ k'ẹjo ọkpoma, nna ẹphe. 3 Ẹphe evudo l'ẹke ẹphe vudo; gebe nchi; a gvaru ẹphe iphe, e deru l'ẹkwo ekemu Ojejoje, bụ Nchileke ẹphe ono awa ẹto. Ẹphe egude awa ẹto ọdo kfushia ẹjo iphe, ẹphe meshiru; bya abaaru Ojejoje, bụ

Nchileke ephe eja. ⁴ Jeshuwa; Bani; Kadimelu; Shebaniya; Buni; Sherabiya; Bani; me Kenanii ephebedua evudo l'ubube ulo-eli, e metaru ndu Lívayi l'ara ekwa echiku Ojejoje, bu Nchileke ephe.

⁵ Ndu Lívayi ono, bu iya bu Jeshuwa; Kadimelu; Bani; Hashabuneya; Sherabiya; Hodiya; Shebaniya; me Petahiya asu ephe:

“Unu wu-lihu; jaa Ojejoje,
 bu Nchileke unu ajaja;
 mbu Nchileke ono,
 no shita l'ojejoje rua l'ojejoje ono.”
 “T'a jakwaa Nchileke ono,
 du biribiri ono ajaja;
 mbu Nchileke ono,
 karia ajaja, aaja iya;
 karia ekele, ekele iya ono.”

Ndu Ízurelu ekfushi ejo iphe, ephe meru

⁶ Ezura abya ekfuru nu Nchileke; su iya:
 “O bu nggubedua nkinyi ngu bu Ojejoje.
 O bu nggu keru igwe;
 kee igwe ophu ka igwe l'eli;
 me iphe bu iphe no iya nu.
 O bu nggu keru ali;
 me iphe bu iphe, no iya nu;
 buru nggu keru eze enyimu;
 me iphe bu iphe, no iya nu.
 O bu nggu meru iphemiphe obule;
 yo nodu ndzu.
 Iphemiphe obule, no l'imigwe
 abakotaru ngu eja.

⁷ “O bu nggube Ojejoje bu

Nchileke ono, ƒotaru
 Ébiramu; dufuta iya ƒe
 Úru l'alì Kalúdiya
 bya agụ-kwazi iya ẹpha;
 yọ ghọo Ébirihamu.

⁸ I phuru l'ọ bu onye e gude
 ire iya ẹka l'ẹke ị nọ;
 nggu l'iya eworu ndzụ gbaa.
 Nnggu ekwee ya ụkwa
 l'i-nụkota yele awa iya
 alì ndu Kénanu;
 kẹ ndu Hetu;
 kẹ ndu Amọru;
 kẹ ndu Pérezu;
 kẹ ndu Jebusu;
 mẹ kẹ ndu Gigashi.
 Ụkwa ono, i kweru ono;
 b'i medzukotaru;
 kẹ l'ì bu onye
 doberu ẹka ndoo.

⁹ I phuru iphe-ẹhuka,
 nna ayi phẹ jeru ƒe Íjiputu;
 nụkwaaphu ẹkwa, ẹphe raru
 l'iku Eze Ẽnyimu Uswe.

¹⁰ I meshiru iphe-ọphulenyá;
 mẹ iphe-ọhubama,
 dụgbaa biribiri
 kpua Fero;
 mẹ ndu ishi ọru iya;
 mẹkpọ ndu alì iya l'ẹphe ha;
 kẹ l'ì maru ẹge ndu Íjiputu
 gude kẹ ekuku,

ẹphe eku onwẹphe;
 gwaa ndibe ngu maa.
 I meru; a maru ẹpha ngu;
 mbụ maru iya ẹge ono jeye ntanụ.

11 I meru eze ẹnyimu;
 yo kekahu ẹbo l'ifu ẹphe;
 k'ọphu bụ l'ẹphe jeru ije
 l'alị ọkponku swee
 eze ẹnyimu ono.
 Obenu ẹ ndu achi ẹphe ọso;
 b'ị tųru mgbaheka;
 ẹphe abụru gvudugungu
 l'ime mini ono
 l'ọ bụ mkpuma, a wushiru
 l'ime eze mini, ha nshinu.

12 O -be l'eswe;
 nggu egude urukpu,
 kpuru rogbodyongu dua ẹphe.
 Teke o -beru l'ẹnyashi;
 nggu egude ọku,
 kpuru rogbodyongu l'edu ẹphe;
 t'ọ bụru iphoro,
 a-nọdu ekoshi ẹphe ụzo.

13 I nyizitaru ẹ Ugwu Sáyınayi;
 nọdu l'imigwe kfuru nụ ẹphe.
 I nuru ẹphe ome-l'alị,
 kfuru nhamunha;
 mẹ ekemu, bụ ọkpobe iya;
 mẹ iphe, ị tọru ọkpa iya,
 bụ iphe, dụ mma.

14 I meru; ẹphe amaru mbọku,
 i doberu t'ọ bụru mbọku
 ọtu-ume ngu, dụ nsọ.

- I shi l'eka nwozi ngu,
 bu Mósísu kfuru ephe
 ekemu, ephe a-nòdu etso.
- 15 Teke egu guru ephe;
 b'ì nuru ephe nri,
 shi l'imigwe;
 bya ekee ephe mini,
 shi l'eze mkpuma t'ephe ngua;
 teke mini guru ephe.
 I sùru ephe t'ephe tugbua
 je anata alì ono,
 i riburu nte l'ìi-nu ephe ono.
- 16 Obule nna ayi phe ono;
 be palilahaaru onwephe eli;
 kwefu ikè; jika ome iphe,
 i sùru t'e meje.
- 17 Ephe jìkaru ome iphe,
 i sùru t'ephe mee;
 zahashìkota iphe ono, du
 biribiri, i meshiru ephe l'ifu ono.
 Ephe ekwefuru ngu ikè;
 ngee ngu eka l'ishi;
 fòta onye ishi, e-duphu
 ephe azu le Íjiputu,
 bu eke ono, ephe shi buru ohu ono.
 Obenu l'ì bu Nchileke, aguje nvu;
 onye emeje eze-iphe-oma;
 onye obu-imiko;
 onye e ta budu onye obu-oku;
 onye n-yemobu iya nyiberu anyibe,
 bu iya meru; ti ha ephe;
- 18 mbu je akpaa le teke
 ephe kpuru onwephe nweswi; su:

'L'ò ọwaa bú Nchileke ẹphe,
 bú onye dufutaru ẹphe lẹ Íjiputu;'
 mẹ teke ono,
 ẹphe kfubyishiru ngu k'ẹjo iya ono.

- 19 Obenu l'i gude k'eze
 obu-imiko ngu ono;
 ti ha ẹphe l'echi-ẹgu.
 Urukpu ono, kpuru
 rogbodongu ono ta ha ẹphe.
 Ooduje ẹphe l'eswe.
 Oku ono, kpuru rogbodongu
 ono ta nyihubua anyihu.
 Oobujeru ẹphe iphoro l'enyashi.
- 20 I nuru ẹphe Ume oma ngu ono
 t'ò kpọ-zijeru ẹphe ọzo.
 E ti jikadu ẹphe onu Mana
 ono, shi ngu l'eka ono.
 I nuru ẹphe mini t'ẹphe ngua
 gude gboo ẹgu mini.
- 21 Ukporo afa ẹbo
 b'i heru ẹphe l'echi-ẹgu;
 to nwe iphe, ọko iya dujeru ẹphe.
 Uwe ẹphe ta akahubua akahu;
 ọphu ọkpa te kobua ẹphe ekoko.
- 22 I meru; ẹphe aluta alị-eze,
 du ichi l'iche;
 luta mbakeshi, du iche iche;
 bya eworu alị ndu ono
 keshiaru ẹphe t'ò buru ókè-alị ẹphe.
 ẹphe nataru alị Heshibonu,
 bú alị-eze Sihonu;
 mẹ alị Báshanu,
 bú alị-eze Ogu.

- 23 I meru t'ụnwu ẹphe ha igwe
 l'ọ bụ mkpọ-kpodo, nọ l'igwe.
 Nggụ edua ẹphe
 dubata l'alị ono, ị sụru nna ẹphe
 t'ẹphe bahụ je anata ono.
- 24 O bụ ụnwu ẹphe bahuru
 je anata alị ono.
 Ị lụ-gburu ẹphe ndu alị ono,
 bụ iya bụ ndu Kénanu.
 I meru tẹ ndu Kénanu;
 ndu eze ẹphe;
 mẹ ndu alị ono l'ẹphe ha
 lakọta ẹphe l'ẹka;
 k'ọphu ẹphe e-me ẹphe ẹge dụ ẹphe mma.
- 25 Ẹphe lụtakotaru mkpụkpu,
 e gudetsua ụpho-mkpuma,
 shihugbaaru ike kpụ-pee
 mgburumgburu;
 mẹ alị-ọtsu;
 natakọta ụlo ngwa,
 dụgbaa iche iche;
 dukota mma; ji ejiji.
 Ẹphe nakwaruphu wẹlu,
 a tūwaru atutu;
 mẹ mgbo vayinu;
 mẹ kẹ olivu;
 mẹ oshi-omi, dụ iche iche.
 Ẹphe eria; rijishia ẹpho;
 dashia okporokpo.
 Ẹgiri iphe ono,
 ị nụkotaru ẹphe ono;
 bẹ ẹphe riru;
 yọ tsoo ẹphe ẹna.

- 26 Obenu l'ẹphe
 kwefuru ngu íkè;
 nwufu ekemu ngu dobe l'agụga.
 Ẹphe gbushiru ndu
 nkfuchiru ngu,
 bụ ndu loru ẹphe
 ẹka lẹ nchị ẹge ee-shi tẹ
 ẹphe ghaa ifu l'ẹke ị nọ.
 Ẹphe kfubyishiru ẹpha ngu ẹji ẹji.
- 27 O bụ iya meru; nggu eworu
 ẹphe ye ndu ọhogu ẹphe l'ẹka,
 bụ ndu kpọberu ẹphe ishi l'ọku.
 O bụ teke ono, ẹphe nọ
 l'iphe-ẹhuka ono;
 bẹ ẹphe rakuru ngu.
 Nggú eshi l'imigwe
 nua ẹkwa ẹphe;
 bya egude obu-imiko ngu
 ono, ha nshinu ono;
 nụ ẹphe ndu mgbafuta,
 bụ ndu nafutaru ẹphe l'ẹka
 ndu ọhogu ẹphe ono.
- 28 Nchị adulephu ẹphe ndoo;
 ẹphe awatakwa ome
 ẹjo iphe l'ifu ngu ọdo.
 Nggú ewokwaru ẹphe ye l'ẹka
 ndu ọhogu ẹphe ọdo.
 Ẹphe abyakwa bya araku ngu ọdo;
 nggu eshi l'imigwe
 nua ẹkwa ẹphe.
 Ugbo olemole b'i gudewa
 obu-imiko ngu;
 nafuta ẹphe.

- 29 I loru ephe eka le nchi;
 ege ee-shi t'ephe lata azu; meje ekemu ngu.
 O bu okfu l'ephe wataleru-a
 opa-li onwephe eli;
 jika ome iphe, i kfulu.
 Ephe meru ejo iphe
 gude mebyia ome-l'alì ngu;
 mbu ome-l'alì ngu ono, bu:
 madzu -mee ya;
 yo nodu ndzu ono.
 Ephe gude l'ephe bu 'anu-g'anu;
 gbakutaru ngu azu;
 kwefuru ngu ikè; jika ngu
 ongaberu nchi.
- 30 I taru ephe nshi afa olemole.
 I gude Ume ngu
 shi l'onu ndu nkfuchiru ngu
 lo ephe eka le nchi.
 O bu l'ephe te yeduru ngu onu.
 Yo buru iya meru;
 nggu eworu ephe ye
 ndu alì odo,
 ephe l'ephe bu obutobu l'eka.
- 31 Obenu l'i gude
 k'obu-imiko ngu ono,
 paru apaa ono;
 jika t'ephe ba achihu;
 jikakwaphu
 l'e tii buhadu ephe eka;
 ke l'i bu Nchileke,
 emeje eze-iphe-oma;
 buru onye aphuje imiko.
- 32 Oo ya bu; nggube Nchileke ayi;

mbu nggube Nchileke,
 ha nshinu; buru Okaribe;
 bya aburu onye du egvu;
 onye edobeje ndzu, o gbaru;
 ophu n-yemobu iya
 'agvujedu agvugvu.
 Byiko te iphe-ehuka-wa,
 ayi eje-wa; ba dukwa ngu
 ruswa-ruswa l'anya;
 bu iya bu iphe-ehuka-wa,
 dakfutaru ayi-a; dakfuta
 ndu eze ayi;
 ndu ishi ayi;
 ndu achijeru Nchileke aja;
 me ndu nkfuchiru Nchileke ayi;
 mbu iphe-ehuka ono,
 dakfutaru nna ayi phe;
 me ndibe ngu l'ephe ha;
 shita l'oge ke
 ndu eze ndu Asiriya jeye ntanu-a.

33 Iphe ono, dakfutakotaru ayi
 ono be iswi dukotakwa ngu mma.
 I meru iphe, kfu ru akfu ru.
 Obenu l'ayibedua meru eji.

34 Ndu eze ayi; ndu ishi ayi;
 ndu achijeru ayi Nchileke aja;
 me nna ayi phe te medu ekemu ngu.
 Ophu ephe 'angadu nchi l'iphe,
 i suru t'e mee; me l'eka,
 i loru ephe le nchi;

35 je akpaa le teke ephe no
 l'ali-eze ephe l'eri egiri iphe ono,
 i nukotaru ephe l'eze ali ono;

mbụ alì-òtsu ono, ì nùru ẹphe ono;
 ẹphe ta abaduru ẹja;
 ọphu ẹphe aghakọbedu;
 haa ẹjo-ụzo, ẹphe etso.

36 Lewaru ẹge ayi bụ ohu
 ntanụ l'alì ono, ì nùru
 nna ayi oche phẹ ono;
 mbụ alì ono, ì nùru ẹphe
 t'ẹphe ria iphe, shi iya nù;
 ria iphe-oma ono,
 nọ iya nù ono.
 Lewaru ẹge ayi bụ ohu ntanụ.

37 Ọ kwa ndu eze ono,
 i doberu t'ẹphe chĩa ayi ono; bẹ iphe,
 shi l'alì ono alakotaru.
 Ishi iya aburu ẹjo iphe,
 ayi meshiru.
 Ẹphe gude ayịbedua;
 gude ẹku ayi
 l'eme iphe, dọ ẹphe mma.
 Ayi nọkwa l'oke iphe-ẹhuka!

Ndu byaru ẹka l'ẹkwo ọgba-ndzụ

38 “Ọ kwa iphe ono meru iphe ayi abya ọgba
 ndzụ-a, ẹ-te etengadu etenga-wa. Ee-dekwa iya
 phụ edede l'ẹkwo tẹ ndu ishi ayi; ndu Lívayi;
 mẹ ndu agbajeru ayi Nchileke ẹja; mee ya iphe-
 ọhubama.”

10

1 Ndu yeru ẹka l'ẹkwo ọgba-ndzụ ono bụ:
 Gọvano Nehemáya Hakalaya; mẹ Zedekaya.
 Ndu ọdo, yeru ẹka l'ẹkwo ọgba-ndzụ ono
 bụ: ² Seráyà; Azaríya; Jeremáyà; ³ Pashọ;

Amariya; Malukíja; ⁴ Hatushi; Shebaniya; Máluku; ⁵ Harimu; Meremotu; Obedáya; ⁶ Dáneḷu; Ginetonu; Baruku; ⁷ Meshulamu; Abíja; Mijiaminu; ⁸ Maaziya; Biligayi; me Shemáya. Ndu ono bukota ndu achijeru Nchileke eja.

⁹ Ndu Lívayi, yeru eka l'ekwo ogba-ndzu ono bu: Jeshuwa Azanaya; Binuyi, bu onye eri Henadadu; Kadumelu; ¹⁰ me unwunna ephe, bu Shebaniya; Hodiya; Kelita; Pelaya; Hananu; ¹¹ Mayika; Rehobu; Hashabaya; ¹² Zaku; Sherabiya; Shebaniya; ¹³ Hodiya; Bani; me Beninu.

¹⁴ Ndu ishi ndu Ízureḷu, yeru eka l'ekwo ogba-ndzu ono bu: Paroshi; Pahatu-Móabu; Élamu; Zatu; Bani; ¹⁵ Buni; Azugadu; Bebayi; ¹⁶ Adónija; Biguvayi; Adinu; ¹⁷ Ateya; Hezekáya; Azuru; ¹⁸ Hodiya; Hashumu; Bezayi; ¹⁹ Harifu; Anatotu; Nebayi; ²⁰ Magupiyashi; Meshulamu; Heziya; ²¹ Meshezabelu; Zédoku; Jaduwa; ²² Pelatiya; Hananu; Anaya; ²³ Hosáya; Hananaya; Hashubu; ²⁴ Haloheshi; Piliha; Shobeḷu; ²⁵ Rehumu; Hashabuna; Maseya; ²⁶ Ahíja; Hananu; Ananu; ²⁷ Máluku; Harimu; me Bena.

Ndzu, a gbaru

²⁸ Ndu Ízureḷu odo, phoduru nu; me ndu achijeru Nchileke eja; ndu Lívayi; ndu nche onu-oguzo eze-ulo Nchileke; ndu egvu; ndu ozi l'eze-ulo Nchileke; iphe, bu ndu kewafuru onwephe l'eke ndu ali odo no l'okfu ekemu Nchileke; unyomu ephe; me iphe, bu unwu ephe ndu ophu iphe dowaru enya; ²⁹ atuko l'ephe ha tsoru ndu unwunna ephe; me ndu a maru epha ephe

aguru ẹnwa kpua onwẹphe; ria nte l'ẹphe a-
nọdu eme ekemu Nchileke; mbụ ekemu ono,
Nchileke shi l'ẹka Mósisu, bụ nwozi iya tụa ono;
l'ẹphe a-nọdu eme iphe, Ojejoje, bụ Nnajiufu
sụru t'e meje; meje ome-l'alị iya; mẹ iphe, ọ tọru
ọkpa iya.

³⁰ “Ayi riburu l'ayi lẹ ndu alị ọdo ta
alụgbahedua nwanyi ọdo.

³¹ “Ọ -buru lẹ ndu alị ọdo vubataru ngwa-
aswa ẹphe; mẹ nri bya erere mbọku ọtu-ume
bẹ ayi ta azụdu ẹphe aswa mbọku ọtu-ume; m'ọ
bụ mbọku ọdo, dụ nsọ. Ayi a-koje alị ayi afa
ishingu; o -rua l'afa k'ẹsaa; ayi ahaa ya t'ọ tuta
ume; hakwaaphu iphe, bụ ụgwo, e ji ayi t'ọ laa.

³² “Iphe ọdo, ayi kwetaru l'ayi a-nọdu eme bụ
l'afa l'afa ha bẹ ayi e-wotaje nkere-ẹto mkpọla-
ọcha bya anụ t'e gude eje ozi, nọ l'ụlo Nchileke
ayi. ³³ Mbụ t'e gudeje iya zuta iphe, e gude
eme buredi, eedobejeru Nchileke nsọ; gude iya
zuta iphe, e gude egwo ngweja-nri; kẹ ngweja-
ukfuru, bụ ọphu eegwoje tekenteke; kẹ ngweja
mbọku ọtu-ume; kẹ Aji Onwa Ophungu; kẹ aji
ọdo, bụ aji, a tụ-buru atụ-bu; kẹ ngweja ọdo,
dụ nsọ; kẹ ngweja-iphe, dụ ẹji ndu Ízurelu;
kẹ ngweja Ụgwo Ejo iphe ndu Ízurelu meshiru;
mẹwaru iphe bụ ozi, eeje ejeje l'ụlo Nchileke ayi.

³⁴ “Ayibe ndu achijeru Nchileke ẹja; ndu
Lívayi; mẹ ndu Ízurelu mmanu bẹ tuakwaru
ẹnwa gude kee ẹge ee-shije akpa nkụ ụlo
Nchileke ayi afa l'afa. E keru ọkpa nkụ ọbu
l'ẹnya-ufu l'ẹnya-ufu; tubukwaaphu teke aa-
kpatajẹ iya; mbụ nkụ, e gude akpọ ngweja ọku

l'eli ɛnya-ngweja Ojejoje, bu Nchileke ayi ɛge ono, e deru iya l'ekemu ono.

³⁵ “Iphe ɔdungu, ayi kpataru l'iphe, ayi meberu l'alì yele akpuru ɔdungu oshi-ɔmi ayi mɛtaru bɛ ayi e-wobataje l'ulo Ojejoje afa l'afa.

³⁶ “O kwaphu ɛge ono bɛ ayi e-kutaje nwata, buru ayi ɔkpara; kputa anu, vuru uzɔ waa nne iya ɔswa l'eswi ayi; aturu ayi; mɛ eghu ayi; gude je l'ulo Nchileke ayi; je anu ndu achijeru Nchileke ɛja, bu ndu eje ozi l'ulo Nchileke ayi ono; ɛge ono, e deru iya l'ekemu ono.

³⁷ “Ayi e-wotajekwaphu iphe ivuzo, a kpataru l'okfu ayi, e gweru egwegwe yele iphe ɔdo, gbaru tɛ ayi nu Nchileke; du l'ɔ bu akpuru ɔdungu, oshi-ɔmi ayi mɛtaru; mɛ mɛɛ ɔphungu ayi; mɛ manu; je anu ndu achijeru Nchileke ɛja t'e dobegbaa l'ulo, aakwakobeje iphe l'ulo Nchileke. Ayi e-wota okè lanu l'uzo iri l'iphe, ayi metaru l'alì nu ndu Lívayi; kɛ l'ɔo ndu Lívayi bɛ anakoje okè lanu l'uzo iri lɛ mkpukpu lɛ mkpukpu ɛke aakobeje iphe l'alì. ³⁸ Onye achijeru Nchileke ɛja, shi l'eri Éronu a-nɔduje swiru ndu Lívayi ono teke ɛphe a-nadu anako ɔzo lanu l'uzo iri ono. Ndu Lívayi ono e-shi l'okè lanu l'uzo iri ono, ɛphe nakoru ono wofuta okè lanu l'uzo iri je edobe l'ulo-ɛku eze-ulo Nchileke ayi. ³⁹ Ndu Ízurelu; mɛ ndu Lívayi bɛ a-tuje nri; mɛɛ ɔphungu; mɛ manu wobata l'ulo-ɛku eze-ulo Nchileke; mɛ ɛke ndu achijeru Nchileke ɛja, l'eje ozi teke ono anɔduje; mɛ ɛke ndu nche ɔnu-ɔguzo; mɛ ndu egvu anoje.

“Ayi ta ahahedu ulo Nchileke ayi ɔdo.”

11

Ndu a-bya eburu lẹ Jerúsalemu

¹ Teke ono bụ ndu ishi ndu Ízurelu bu lẹ Jerúsalemu. Ndu Ízurelu ọphu abya atụa ẹnwa gude fọta ndu a-bya eburu lẹ Jerúsalemu, bụ mkpụkpu ono, dū nsọ ono. Ẹphe eshije l'umadzu iri fọta onye lanu t'ọ bya eburu lẹ Jerúsalemu; ẹphe ahaa tete ọphu t'ẹphe buru lẹ mkpụkpu ẹphe. ² Ndu kweru nụ; wofuta onwẹphe l'ẹphe e-buru lẹ Jerúsalemu bẹ ndu Ízurelu jaru ajaja. ³ Ndu ọwaa bụ ndu ishi mkpụkpu, bụ ndu ọphu bu lẹ Jerúsalemu. Obenu lẹ ndu Ízurelu; ndu achijeru Nchileke ẹja; ndu Lívayi; ndu eje ozi l'eze-ulo Nchileke; mẹ ndibe ndu ejeru Sólomonu ozi bẹ onyenonu bu l'alị k'ẹka iya lẹ mkpụkpu ẹphe lẹ Júda. ⁴ Uphodu ndu Júda; mẹ ndu Bénjaminu hakwaruphu buru lẹ Jerúsalemu.

Ndu Júda, bu lẹ Jerúsalemu bụ: Ataya. Ataya bụ nwatibe Uzáya; Uzáya aburu nwatibe Zekaráya; Zekaráya aburu nwatibe Amariya; Amaraya aburu nwatibe Shefatíya; Shefatíya aburu nwatibe Mahálalẹlu, bụ onye shi l'eri Pérezu.

⁵ Onye ọdo bụ Maseya. Maseya bụ nwatibe Baruku; Baruku aburu nwatibe Kọlu-hoze; Kọlu-hoze aburu nwatibe Hazaya; Hazaya aburu nwatibe Adaya; Adaya aburu nwatibe Joyaribu; Joyaribu aburu nwatibe Zekaráya, bụ onye shi l'eri Sháyilo.

⁶ Ndu ufu Pérezu, bu lẹ Jerúsalemu bẹ kpakọru dū unu madzụ; l'ụkporo madzụ ẹto l'umadzu ẹsato; bụkotaru mkparawa.

⁷ Ndu Bénjaminu, bu ị Jerúsalemu bu: Salu. Salu bu nwatibe Meshulamu; Meshulamu aburu nwatibe Jowedu; Jowedu aburu nwatibe Pedaya; Pedaya aburu nwatibe Kolaya; Kolaya aburu nwatibe Maseya; Maseya aburu nwatibe Itiyelu; Itiyelu aburu nwatibe Jeshaya.

⁸ A bya eyeru iya unwunna Salu phe, bu iya bu Gabayi; me Salayi.

Iphe epe kpakoru du bu unu madzu labu l'ukporo madzu isingu l'umadzu esato. ⁹ Onye bu onye ishi epe bu Jowelu Zikiri. Juda Hasenuwa aburu onye etsota onye ishi le mkpukpu ono.

¹⁰ Ndu achijeru Nchileke eja, bu le Jerúsalemu bu: Jedaya Joyaribu; Jakinu; ¹¹ me Seraya Hilikaya. Hilikaya bu nwatibe Meshulamu; Meshulamu aburu nwatibe Zedoku. Zedoku bu nwatibe Merayotu. Merayotu aburu nwatibe Ahitubu, bu onye ishi l'ulo Nchileke. ¹² E -yeru iya unwunna epe, bu ndu eje ozi l'ezeulo Nchileke be iphe, epe kpakoru du bu unu madzu labu l'ukporo umadzu l'umadzu labu.

Onye odo bu Adaya Jerohamu. Jehoramu bu nwatibe Pelalaya; Pelalaya aburu nwatibe Amuzi. Amuzi bu nwatibe Zekaraya; Zekaraya aburu nwatibe Pasho; Pasho aburu nwatibe Malukija. ¹³ E -yeru iya unwunna iya, bukota ndu ishi l'onu-ufu epe; be iphe, epe kpakoru du bu ukporo madzu iri l'ebo l'umadzu ebo.

Onye odo bu Amashayi Azarelu. Azarelu bu nwatibe Ahuzayi; Ahuzayi aburu nwatibe Meshilemotu; Meshilemotu aburu nwatibe Imá.

¹⁴ E -yeru iya unwunna iya, bukota ike-ka-l'ogu

phẹ bẹ iphe, ẹphe kpakọru dọ bọ ọkporo madzọ ishingu l'umadzu ẹsato. Onye ishi ẹphe bọ Zabudiyẹlu Hagedolimu.

¹⁵ Ndu Lívayi, bu lẹ Jerúsalemu bọ: Shemáya Hashubu. Hashubu bọ nwatibe Azurikamu; Azurikamu abọru nwatibe Hashabaya; Hashabaya abọru nwatibe Buni.

¹⁶ Ndu ọdo bọ: Shabetayi yẹle Jozabadu, bọ ndu ishi ndu Lívayi, bọ ndu eleta ẹnya l'ozi, eeje l'azọ ọlo Nchileke.

¹⁷ Onye ọdo bọ: Mataníya Mayịka. Mayịka bọ nwatibe Zabudi; Zabudi abọru nwatibe Ásafu, bọ onye ishi egvu-ekele; mẹ kẹ okfu anọ Nchileke.

Bakubukaya bọ onye k'ẹbo l'unwunna Mataníya.

Onye ọdo bọ Abuda Shamuwa. Shamuwa bọ nwatibe Galalu; Galalu abọru nwatibe Jedutunu.

¹⁸ Ndu Lívayi, bu lẹ mkpukpu ono, dọ nsọ ono bẹ kpakọru dọ ọkporo madzọ iche iche ugbo iri l'ẹno l'umadzu ẹno.

¹⁹ Ndu nche ọnu-ọzo eze-ọlo Nchileke bọ: Akubu; Talumọnu; mẹ unwunna ẹphe, bọ ndu nche ọnu eze-ọlo Nchileke. Iphe, ẹphe dọ bọ ọkporo madzọ iche iche ugbo ẹsato l'umadzu iri l'ẹbo.

²⁰ Ndu phoduru nọ lẹ ndu Ízurelu ọdo; ndu achijeru Nchileke ẹja; mẹ ndu Lívayi bukota lẹ mkpukpu mkpukpu, nọgbaa l'alị Júda. Onyenọnu bugbaa l'ókè-alị nk'iya. ²¹ Ndu ejeje ozi l'eze-ọlo Nchileke bẹ buru l'ugvu Ofẹlu lẹ Jerúsalemu. Yọ buru Ziha yẹle Gishipa bọ ndu ishi ndu ono, ẹje ozi l'eze-ọlo ono.

²² Ndu bu ndu ishi ndu Lívayi ono, bu le Jerúsalemu bu: Uzi Bani. Bani bu nwatibe Hashabaya; Hashabaya aburu nwatibe Mataniya; Mataniya aburu nwatibe Mayika, bu onye shi l'eri Ásafu. Ndu eri Ásafu bu ephe bu ndu ishi egvu l'eze-ulo Nchileke. ²³ Ndu k'egvu ono be eze turu ekemu swiberu. Yo buru ekemu k'eze ono bu iya ekoshije ephe iphe ephe a-nodu eme mboku-mboku.

²⁴ Onye no-chiru enya ndu Ízurelu l'ifu eze bu Petahiya Meshezabelu, shi l'eri Zera Júda.

Ndu Ízurelu, bu l'ime ime obodo

²⁵ A bya l'ime obodo l'eke ephe akoje iphe; unwu Júda be haru buru le Kiriyatu-aba; me unwu edukfu edukfu, nokota iya nu. Ephe hakwaruphu buru le Dibonu; me edukfu edukfu, nokota iya nu; me Jakabezelu; me edukfu edukfu, nokota iya nu. ²⁶ Ephe buru le Jeshuwa; Molada; Betu-Peletu; ²⁷ Haza-shuwalu; Besheba yele edukfu edukfu, nokota iya nu; ²⁸ me le Zikulagu; me Mekona yele edukfu edukfu, nokota iya nu; ²⁹ me le Enu-Rimonu; Zora; Jamutu; ³⁰ Zanowa; me Adulamu yele edukfu edukfu, nokota iya nu; me le Lakishi yele ali, nokota iya nu; me le Azeka yele edukfu edukfu, nokota iya nu. Oo ya bu l'ephe buru shita le Besheba jeye le nsuda Hínomu.

³¹ Ndu Bénjaminu be shi le Géba bua kwaseru. Ephe buru le Mikumashi; Ayija; me Betelu yele edukfu edukfu, nokota iya nu; ³² me le Anatotu; Nobu; Ananiya; ³³ Házo; Ráma; Gitayimu; ³⁴ Hadidi; Zeboyimu; Nebalatu; ³⁵ Lodu; me Ono

yẹle Nsuda Ndu Eme Nka. ³⁶ Ẹphodu ndu Lívayi, ẹphe lẹ ndu ikfu Júda shi buru b'e keru yeru ndu ikfu Bénjaminu.

12

Ndu achijeru Nchileke ẹja; mẹ ndu Lívayi

¹ Ọwaa bụ ndu achijeru Nchileke ẹja; mẹ ndu Lívayi, ẹphe lẹ Zerúbabelu Sheyalutiyẹlu; mẹ Jeshuwa yi; shi l'ẹke a kpuru ẹphe lẹ ndzụ laa ndo-ọ: Seráya; Jeremáya; Ẹzura; ² Amariya; Máluku; Hatushi; ³ Shekaniya; Rehumu; Meremotu; ⁴ Ido; Ginetoyi; Abíja; ⁵ Mijiaminu; Madiya; Biliga; ⁶ Shemáya; Jorariibu; Jedaya; ⁷ Salu; Amọku; Hilikaya; mẹ Jedaya. Ndu ono shi bukotaru ndu ishi ndu achijeru Nchileke ẹja; bugbakwaaruphu ishi l'unwunna ẹphe l'oge kẹ Jeshuwa.

⁸ Ndu kẹ Lívayi bụ: Jeshuwa; Binuyi; Kadimiyẹlu; Sherabiya; Júda; mẹ Mataniya. Ọ bụ Mataniya yẹle unwunna iya bẹ bụ ndu kẹ egvu-ekele nọ l'ẹka.

⁹ Unwunna ẹphe; mbụ Bakubukaya yẹle Uni bẹ gbakoberu ogbo-egvu, ekwejeru ẹphe egvu ono.

Eri Jeshuwa, bụ onye ishi ndu achijeru Nchileke ẹja

¹⁰ Jeshuwa bụ nna Joyakimu; Joyakimu aburu nna Eliyashibu. Eliyashibu bụ nna Joyada; ¹¹ Joyada aburu nna Jonátanu; Jonátanu aburu nna Jaduwa.

Ndu bụ ishi l'ọnu-ulo ndu achijeru Nchileke ẹja

12 L'oge ke Joyakimu; owaa ndu shi bugbaaru ishi l'onu-ulo ndu achijeru Nchileke eja:

Onye ishi ke onu-ulo

Seraya bu Meraya; onye ishi ke onu-ulo

Jeremaya aburu Hananiya.

13 Onye ishi ke onu-ulo

Ezura bu Meshulamu; onye ishi ke onu-ulo

Amariya aburu Jehohananu.

14 Onye ishi ke onu-ulo

Maluku bu Jonatanu; onye ishi ke onu-ulo

Shebaniya aburu Josefu.

15 Onye ishi ke onu-ulo

Harimu bu Aduna; onye ishi ke onu-ulo

Merayotu aburu Helukayi.

16 Onye ishi ke onu-ulo

Ido bu Zekaraya; onye ishi ke onu-ulo

Ginetonu aburu Meshulamu.

17 Onye ishi ke onu-ulo

Abija bu Zikiri; onye ishi ke onu-ulo

Miniyaminu yele

Mowadiya aburu Pilitayi.

18 Onye ishi ke onu-ulo

Biliga bu Shamuwa; onye ishi ke onu-ulo

Shemaya aburu Jehonatanu.

19 Onye ishi ke onu-ulo

Joyaribu bu Matenayi;

onye ishi ke onu-ulo Jedaya aburu Uzi.

20 Onye ishi ke onu-ulo

Salayi bu Kalayi; onye ishi ke onu-ulo

Amoku aburu Eba.

21 Onye ishi ke onu-ulo

Hilikaya bu Hashabaya;

onye ishi ke ọnu-ulo Jedaya aburu Netanelu.

Eedeshi epha ndu achijeru Nchileke eja; me ke ndu Lívayi

²² L'oge ke Eliyashibu; ke Joyada; ke Johananu; ke Jaduwa b'e dekotaru epha ndu ishi ndu Lívayi; me ke ndu ishi ndu achijeru Nchileke eja l'ekwo. Epha ono b'e deru teke Dariyosu bu eze, l'achi Peshiya.

²³ Unwu Lívayi, bu ndu ishi l'ọnu-ulo nna epe b'e dekotaru epha epe l'ekwo, e deshiru iphe meru nu l'oge ke Johananu Eliyashibu.

Eekeshi ozi l'eze-ulo Nchileke

²⁴ Ndu bu ishi ndu Lívayi bu: Hashabaya; Sherabiya; me Jeshuwa Kadimiyelu. Unwunna epe egude egvu-ajaja yele egvu-ekele l'ekweru epe egvu, bu iya bu ege Dévidi, bu onye ke Nchileke toru epe okpa iya.

²⁵ Mataníya; Bakubukaya; Obedáya; Meshulam; Talumonu; me Akubu be bu ndu nche l'ọnu eze-ulo Nchileke.

²⁶ Ndu ono be jeru ozi l'oge ke Joyakimu Jeshuwa Jozadaku; me l'oge ke Nehemáya, bu govano; mekwaphu l'oge ke Ezura, bu onye achijeru Nchileke eja bya aburu o-de-ekwo.

Eeye Nchileke upho-mkpuma Jerúsalemu l'eka

²⁷ Yo be teke ee-woru upho-mkpuma Jerúsalemu ono ye Nchileke l'eka; a choru ndu Lívayi jekota iphe, bu eke, epe bu; t'epe byakota Jerúsalemu bya egude ehuto-ona; me egvu-ekele; kua ogele; kpoo une;

mẹ ibekwe; gude woru ụpho-mkpuma ono ye Nchileke l'ẹka. ²⁸ Ndu Lívayi, bụ ndu ọgbo-egvu ono eshi l'iphe bụ alị, nọ-pheru Jerúsalemu mgburumgburu; mẹ edukfu nọtsua lẹ Netofa dzukota. ²⁹ Ndu ọphu shi lẹ Bétu-Gílígalu; mẹ l'uzo Géba; mẹ Azumavetu edzua; kele ndu ọgbo-egvu ono bẹ metaru mkpukpu buphee Jerúsalemu mgburumgburu. ³⁰ Ndu achíjeru Nchileke ẹja; mẹ ndu Lívayi edoo onwẹphe nsọ; bya edokwaaphu ndu Ízurelu nsọ; bye edoo ọnu-ọguzo Jerúsalemu yele ụpho-mkpuma ono nsọ.

³¹ Teke ono bẹ mu bya eduta ndu ishi ndu Júda; ẹphe enyihu eli ụpho-mkpuma ono. Mu abya agbaa uzi ndu egvu ẹbo, hagbaa nshinu, bụ ndu a-nọdu agụ egvu-ekele.

Uzi lanụ edzebe; shia eli ụpho-mkpuma ono ụzo ẹka-ụtara lufuta lẹ Ọnu-ọguzo Ikpozu. ³² Ndu tso ẹphe l'azụ abụru Hoshaya; nkere-ẹbo ndu ishi ndu Júda; ³³ Azaríya; Ézura; Meshulam; ³⁴ Júda; Bénjaminu; Shemáya; Jeremáya; ³⁵ mẹ ndu ọdo, shi l'eri ndu achíjeru Nchileke ẹja, chígbaa ụpyoku; mękwaphu Zekaráya Jonátanu. Jonátanu bụ nwatibe Shemáya; Shemáya abụru nwatibe Mataníya. Mataníya bụ nwatibe Mikaya; Mikaya abụru nwatibe Zakuru. Zakuru bụ nwatibe Ásafu; ³⁶ yele unwunna iya, bụ Shemáya; Azarelu; Milalayi; Milalayi; Mayi; Netanelu; Júda; mẹ Hanani. Ẹphebedua bẹ gude ụduru ngwa-egvu, Dévidi, bụ onye ke Nchileke sụru t'e gudeje. Yọ bụru Ézura, bụ o-de-ẹkwo bẹ vutaru ẹphe ụzo. ³⁷ Ẹphe erulephu Ọnu-ọguzo

Mini; shia l'ẹphe eshi l'ubube ọlo-eli, eeshije enyiba ẹ Ẹkpọkpọ Dévidi; mbụ l'eli mkpokobe ẹke, laru l'upho-mkpuma ono; ẹphe eshia l'eli eli mgboro ọlo Dévidi; lufuta ẹ Ọnu-oguzo Mini, nọ l'uzo ẹnyanwu-ahata.

³⁸ Ndu egvu k'ẹbo awuru shia ọzo ẹka-ibyita. Mbẹdua; mẹ nkere-ẹbo ndu Ízurelu l'etso ẹphe l'azu; awua l'eli upho-mkpuma ono; shi l'ulo-eli Ọku-uzu lufuta ẹ Obosara Upo-mkpuma. ³⁹ Ayi eshi l'ẹke ono wuru je eswee Ọnu-oguzo Ífuremu; swee Akahụ Ọnu-oguzo; swee Ọnu-oguzo Ẹma; swee Ọlo-eli Hananelu; swee Ọlo-eli Ụkporo-ise; shi ẹke ono lufuta ẹ Ọnu-oguzo Aturu. Yọ buru ẹ Ọnu-oguzo Nche bẹ ẹphe jebeberu.

⁴⁰ Ndu ogbo-egvu labu ono, aguje egvu-ekele ono abya edoo onwẹphe l'ulo Nchileke. Mbẹdua; mẹ nkere-ẹbo ndu ishi ono abyakwaphu bya edoo onwayi. ⁴¹ Ndu achijeru Nchileke ẹja, bu iya bu Ẹliyakimu; Maseya; Miniyaminu; Mikaya; Eliyowenayi; Zekaraya; mẹ Hananaya abyakwaphu bya edoo onwẹphe; gudetsua upyoku. ⁴² Ndu ọdo, tso ẹphe bu: Maseya; Shemaya; Eliyẹza; Uzi; Jehohananu; Malukija; Ẹlamu; mẹ Eza. Ndu egvu ono awata ogu egvu; onye bu onye ishi egvu ẹphe aburu Jezurahiya.

⁴³ Mbọku ono bẹ ẹphe gworu ngweja, ha nshinu. Ẹhu atsọo ẹphe ẹna; ke ẹ Nchileke meru t'ẹhu tsọo ẹphe ẹna nshinu. Unwanyi; mẹ unwegirima atuko tee ẹswa. Uzu ẹhu-otso-ẹna, ada ẹ Jerúsalemu b'e gbe nọdutsuaru l'ẹke, teru ẹnya l'anu.

Iphe, a nuru t'e gude abaru Nchileke eja l'ulo iya

⁴⁴ O bu mboku ono b'a fotararu ndu e-letaje enya l'ulo, eedobeje iphe; mbu letaje enya l'iphe, a turu atutu; me akpuru iphe odungu; me okè lanu l'uzo iri. Ndu ono e-shije l'iphe bu okfu, a kuru le mkpukpu ono mgburumgburu wobata iphe bya edobe l'ulo-eku ono, eedobeje iphe ono ege ekemu suru t'e mejeru iya ndu achijeru Nchileke eja; me ndu Lívayi; kele ndu Júda be ehu atso ena l'eke ndu achijeru Nchileke eja; me ndu Lívayi ono, eje ozi ono no. ⁴⁵ Ephe eje ozi Nchileke ephe; l'eje ozi k'osafu mmeru; ege ono, ndu egvu; me ndu nche onu-oguzo ejekwaphu ozi, ruberu ephe; l'uzo ono, Dévidi; me nwa iya, bu Sólomonu suru t'e meje iya ono. ⁴⁶ Ishi iya aburu le teke Dévidi; me Ásafu no ndzu; mbu l'oge ndiche b'e shi nweru ndu ishi ndu egvu; nweru egvu, e gude aja Nchileke ajaja; me egvu, e gude ekele iya ekele. ⁴⁷ L'oge ke Zerúbabelu yele Nehemáya be ndu Ízurelu l'ephe ha ewotaje iphe, ruberu ndu egvu; me ndu echeje nche onu-oguzo nu ephe mboku-mboku. O kwaphu ege ono be ephe edobeje iphe nsò nu ndu Lívayi; ndu Lívayi edobe iphe nsò nu ndu ufu Éronu.

13

Eebufu ndu ohodo l'eke ndu Ízurelu no

¹ Mboku ono b'a guru ndu Ízurelu iphe, e deru l'ekwo Mosisu; ephe anukota iya. A bya agua gu-vu eke, e deru t'e b'o dukwa onye Amonu; m'o bu onye Móabu, ee-kwe t'o bata l'eke ndu ke

Nchileke dzuru. ² Ishi iya aburu l'ephe te gudedu nri; ephe te gude mini bya ndu Ízurelu ndzuta. Ephe egbe butachia Bélamu; t'ò bya atua ephe onu. O bu le Nchileke ayi; gharu onu ono ighafu; yo ghoò onu-oma. ³ Ndu Ízurelu anulephu iphe, ekemu ono kfulu; bufukota ndu ohodo l'èke ndu Ízurelu no.

Nehemáya edozi iphe

⁴ Tèmanu iphe ono emee be Eliyashibu, bu onye achijeru Nchileke eja; mbu onye a fataru t'ò buru onye ishi eke eedobeje iphe l'eze-ulo Nchileke; be yele Tobaya du le mma nshinu. ⁵ Eze ime-ulo ono, e shi edobeje ngweja-nri; insensu; ngwa, e gude eje ozi l'eze-ulo Nchileke; me okè lanu l'uzo iri ke witu; ke mee; ke manu, aasuje t'e wotaru ndu Lívayi; me ndu egvu; me ndu nche Onu-oguzo; mbu ime-ulo ono, e shi edobeje iphe, a turu utu nu ndu achijeru Nchileke eja ono be Eliyashibu nuru Tobaya. ⁶ Teke ono, iphe ono eme ono be mu ta nodu le Jerúsalemu; ke l'afa, kwe Atakusakusesu ukporo afa l'afa iri l'èbo, o wataru obu eze ndu Bábyilonu; be mu jeru k'eze. A nota nwanshi; mu arò eze t'ò haa mu te mu la. ⁷ Mu abya alaruta Jerúsalemu bya aphu iphe, du eji ono, Eliyashibu meru l'okfu ehú Tobaya ono; mbu anunu ono, o nuru iya mkpura l'eze-ulo Nchileke ono. ⁸ Iphe ono eghushikpoo mu eghughu ike; mu achitakota ngwa ulo, bu ke Tobaya, no le mkpura ono; tufashia l'etezi. ⁹ Mu abya atua iwu; a bya emeshia ime-ulo ono emeshi; mu abya egwotakota ngwa, eegudeje eje ozi l'ulo Nchileke

bya edobephu azụ l'ẹke ono; mę ngweja-nri; mę ínsensu.

¹⁰ Yọ byakwaphu bya edoo mu ęnya l'ẹ taa nujehedu ndu Lívayi iphe, ruberu ẹphe. Yo mee k'ophu bụ lẹ ndu Lívayi; mę ndu egvu, l'eje ozi l'eze-ụlo Nchileke ono bę gbakashihuru nụ; onyenonu alashia je akolaha okfu iya. ¹¹ Tọ dụ iya bụ; mu abaaru ndu ishi mba; sụ ẹphe: “? Bụ ngunu meru; a paru eze-ụlo Nchileke gbado ẹge-a?” Mu abya achikobe ndu Lívayi; mę ndu ono, aguje egvu ono dobephu azụ l'onodu ẹphe. ¹² Yọ buru teke ono bę ndu Júda l'ẹphe ha wobatalahaaru okè lanụ l'uzo iri, shi l'akpuru iphe ẹphe kpataru; mę męe; mę manụ l'ulo-ẹku. ¹³ Ndu mu turu ẹka t'ẹphe buru ndu ishi ụlo ono, eedobeje iphe ono bụ: Shelemíya, bụ onye achijeru Nchileke ẹja; mę Zédoku, bụ ode-ẹkwó; mę onye Lívayi, aza Pedaya. Onye mu fọtaru swibe ẹphe t'o yejeru ẹphe ẹka bụ Hananu Zakuru Mataníya; kele ndu ono b'a guru lẹ ndu e gude ire ẹphe ẹka. Ozi ẹphe aburu t'ẹphe kejeeru unwunna ẹphe iphe.

¹⁴ Nggube Nchileke mu; nyatakwa mu lẹ k'iphe-wa. Be efuchafukwa iphe, dụ mma, mu mekotaru l'okfu eze-ụlo nggube Nchileke mu mę l'okfu ozi ono, eeje l'ẹke ono.

¹⁵ O bụ teke ono bę mu phuru ndu nọ lẹ Júda l'adzoshi męe l'akpuru vayinu mbọku otu-ume; gude inya-ivu evubatagbaa akpuru oshi; mę męe; akpuru vayinu; akpuru figu; mę ngwa odo, dụ iche iche. Ẹphe evu iya ala Jerúsalemu l'otu-ume. Mu alọ ẹphe ẹka lẹ nchị t'ẹphe be erejehe nri mbọku ono. ¹⁶ Ndu Táya, bụ ndu

bukwaphu le Jerúsalemu evubataje ema; me ngwa-aswa odo, du iche iche l'ere ndu Júda le Jerúsalemu mboku otu-ume. ¹⁷ To du ya bu; mu abaaru ndu a maru epha epe le Júda mba; su epe: “?Ejo iphe-a, unu eme-a bu ngunu; mbu ke t'unu emerushi mboku otu-ume emerushi? ¹⁸ ?To budu egbe iphe ono be nna unu phe meru, meru iphe, Nchileke ayi meru te ejo iphe-ehuka-a dakfuta ayi; dakfutakwaphu mkpukpu-a? Unu abyakwa nta-a bya awata omerushi mboku otu-ume; shi ege ono eme te oke ehueghughu Nchileke kabaa odakfu ndu Izurelu.”

¹⁹ Yo be l'urenyashi mboku nchi-ta-abohu iya a-buru mboku otu-ume; mu atua ekemu su t'a gbachishikota onu-uzo Jerúsalemu; sukwaphu t'e b'a guhakwa iya aguha jeye teke mboku otu-ume ono a-gvu. Mu abya aharu ndu ozi mu dokatsua l'onu-uzo ono t'e b'o dushi ngwa, ee-vubataje mboku otu-ume ono. ²⁰ Iphe ono emee; ndu ngho; me ndu ere ngwa-aswa, du iche iche aharu radu l'azu Jerúsalemu ugbo lanu; m'o bu ugbo ebo. ²¹ Mu abya aloru epe eka le nchi; su epe: “?Bu ngunu meru; unu aradu je l'azu upho-mkpuma ono? Unu -mee ya odo be mu adakwa unu eka.” Tsube teke ono kwaseru be epe byabuhuru mboku otu-ume. ²² Mu asu ndu Lívayi t'ephe sachaa onwephe asacha je anodu cheje nche l'onu-oguzo ono; k'ophu eedobe mboku otu-ume ono nsó.

Nyatakwa mu phu k'iphe ono; nggube Nchileke mu; guderu n-yemobu ngu ono, ha nshinu ono phuaru mu imiko.

23 Ọ bú teke ono; ẹ mu ọ́kwaruphu ndu Ju, ọ́shiru ọ́nwanyi Ashudọ́du; ọ́nwanyi Amọ́nu; mẹ ọ́nwanyi Móabu. 24 Nkere-ẹbo l'ọ́nwegirima ẹ́phe l'anúkota okfu ndu Ashudọ́du; m'ọ́ bú okfu ndu ibyiya nk'ẹ́phe. Ẹ́phe ta ma okfu ndu Júda. 25 Mu abaaru ẹ́phe mba; ọ́ta ẹ́phe ọ́nu; nweru ndu ọ́phu mu chiru iphe; feshia ẹ́phe ẹ́gbushi l'ishi. Mu asụ ẹ́phe t'ẹ́phe gude ẹ́pha Nchileke ria nte l'ẹ́phe ọ́ ndu ọ́hodo ta alụgbahedu nwanyi ọ́do. 26 ?Tọ́ ọ́dunua k'ọ́nwanyi, ọ́ ẹ́ge ono ẹ́ Ọ́sólomọ́nu, bú eze ndu Ízurelu gude mee iphe, ọ́ ẹ́ji tọ́? L'iphe bú mbakeshi b'ẹ́ t'ọ́ ọ́kwa eze ọ́do, ọ́ l'ọ́ bú yẹbedua. Ọ́ bú onye Nchileke iya yeru obu; Nchileke emee ya t'ọ́ ọ́buru eze ndu Ízurelu l'ẹ́phe ha. Obenu l'ọ́o ọ́nwanyi ọ́hodo ẹ́ kparu iya ome iphe, ọ́ ẹ́ji. 27 ?Ọ́ ọ́du mma tẹ́ ayi gude nchị ayi nua l'unu eme iphe, ọ́ ẹ́ji, ha ẹ́ge-a; mbụ l'unu ọ́shiru ọ́nwanyi ọ́hodo; shi ẹ́ge ono ọ́buru ndu mesweru Nchileke ayi tọ́?

28 Onye lanu l'unwu Joyada Eliyashibu, bú onye ishi ndu achijeru Nchileke ẹ́ja ẹ́ bú ọ́go Sambálatu, bú onye Họronu. Mu achifu iya t'ọ́ shi l'ẹ́ke mu nọ́ lufu.

29 Nyatakwa ẹ́phe; nggube Nchileke mu; kẹ́ l'ẹ́phe meruwaru ọ́kwa ndu achijeru Nchileke ẹ́ja; bya emerua ọ́gba-ndzụ, nggu ọ́ ndu achijeru Nchileke ẹ́ja; mẹ́ ndu Lívayi gbaru.

30 Tọ́ ọ́du iya bú; mu asafúkota ẹ́phe mmeru, ẹ́phe chitaru l'ẹ́hu ndu alị ọ́do; bya ekeeru ẹ́phe ozi, gbaru ndu achijeru Nchileke ẹ́ja; mẹ́ ndu Lívayi. Onyenọ́nu ejelaha ozi, gbaru iya nụ.

³¹ Mu emekwaaphu t'e vutaje nkù l'oge iya; yèle akpuru iphe ọdungu.

Nggube Nchileke mu; nyatakwa mu rù lẹ k'oma.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb